

**ASO GAFUA, 08 FEPUARI 2021**

*Na nofoia e le Fofoga Fetalai le Nofoa i le itula e 9:20 i le taeao.*

Tatalo.

**FOFOGA FETALAI:** Ou te faasila atu ua amatalia nei Taualumaga a le Fono Aoao Faitulafono.

**FAAALIGA MAI LE TAITAI O LE MAOTA**

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoao Faitulafono mo le iloiloina o Tulafono Tau Faaofi ua faaalia i inei:

1. Tulafono Tau Faaofi o Teuteuga o le Tulafono o le Matagaluega o Mataupu Tau Tina ma Tamaitai 2021.
2. Tulafono Tau Faaofi o Teuteuga o le Tulafono o Mataupu Tau Lotoifale 2021.

**TUUINA ATU** i lenei aso Faraile, 05 o Fepuari i le tausaga 2021.

Hon TUILAEPA Dr. Sailele Malielegaoi  
**TAITAI O LE MAOTA**

**TUSI FAAMAONIA O LE TULAGA FAANATINATI**

*Na fofogaina e le Fofoga Fetalai le Tusi Faamaonia o le Tulaga Faanatinati.*

E tusa ai ma le Tulafono Tumau 100(2), ua tuuina atu nei le Faaaliga i le Fono Aoao Faitulafono mo le iloiloina o le Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o le Matagaluega o Mataupu Tau Tina ma Tamaitai 2021.
2. Tulafono Tau Faaofi o Teuteuga o le Tulafono o Mataupu Tau Lotoifale 2021.

**TUUINA ATU** i lenei aso 05 o Fepuari i le tausaga 2021.

Hon TUILAEPA Dr. Sailele Malielegaoi  
**TAITAI O LE MAOTA**

**FOFOGA FETALAI:** Ia, ou te faatalofa atu i le paia o le Palemene i lenei taeao, e ui lava ina louloua le tau, a ua maua lava avanoa e tuuina mai e le Atua e afiofio ma talaaao mai ai e faatino lo tatou valaauna. Ia, malo le tauatai, malo le lagi e mama, ua faamalo foi le soifua manua

#### **ISI FAASILASILAGA A LE FOFOGA FETALAI**

**FOFOGA FETALAI:** Mo le silafia e le Palemene ua ou taulimaina nei Teuteuga o le Poloaiga ua maea ona sainia e le Afiofa i le Ao Mamalu o le Malo.

Ma ou te tapa le Susuga i le Failautusi o le Fono Aoao Faitulafono na te tolauauina nei Teuteuga.

*Na fofogaina e le Failautusi le Teuteuga o le Poloaiga o Faalavelave Tutupu Faafuasei.*

#### **TEUTEUGA O POLOAIGA MO FAALAVELAVE TUTUPU FAAFUASEI MO LE KOVITI-19 – Aso 04 Fepuari 2021**

**Fuafuaga mo malaga e toe faafoi mai ai tagatanuu i le kuata lona 2 o le tausaga.**

I lana Fonotaga o le Aso Tofi, 04 Fepuari 2021, na talanoaina ai e le Kapaneta le Pepa (PK2021 90) na faamaonia ai le faagasologa o malaga mo le kuata lona 2 o lenei tausaga ua faatulagaina mo le toe faafoiina mai o tagata i Samoa e pei ona auiliili atu i lalo.

1. 17 Aperila 2021 – Malaga fuafuaina mo pasese mai Amerika, Hawaii, Kanata, Alaska ma Europa e ui mai i Aukilani. Ia feutagai lelei ma le Malo o Niu Sila faapea le Ea Niu Sila e fetuunai taimi o le malaga mai o vaa i Apia ina ia fesootai lelei ma taimi o vaalele, mai Amerika.
2. 07 Me 2021 – Malaga mai Ausetalia ma Niu Sila mo tagata galulue faavaitaimi faapea pasese mai Asia e aofia ai ma gasegase sa siimai i Initia.
3. 28 Me 2021 – Malaga mai Ausetalia ma Niu Sila, e aofia ai tagata galulue faavaitaimi.
4. 18 Iuni 2021 – Malaga mai Ausetalia ma Niu Sila.

O nei Teuteuga e amata faamamaluina i le aso 14 Fepuari 2021. E faatumauina pea isi aiaiga o Poloaiga o Faalavelave Tutupu Faafuasei na muai tuuina atu.

O lenei faaiuga na faia i lona Tulaga Faanatinati e tusa ai ma le Vaega 38(1)(c) o le Faavae o le Malo Tutoatasi o Samoa.

Sainia:

Tuimalealiifano Vaaletoa Sualauvi II  
**O LE AO O LE MALO**

### **TUUINA ATU O PEPA**

*Na tolaulauina e le Failautusi le faasologa o le Tuuina atu o Pepa e tusa ai ma T.T.49(2).*

1. P.P.2020/2021 Nu.130, Lipoti Faaleausaga a le Matagaluega o Tina ma Tamaitai, Atinae o Nuu ma Afioaga ma Agafesootai 2019/2020.
2. P.P.2020/2021 Nu.131, Fuafuaga Autasi a le Pulega o le Suavai 2021-2024.
3. P.P.2020/2021 Nu.132, Faamatalaga o Sini Autu a le Pulega o le Suavai 2021-2024.
4. P.P.2020/2021 Nu.133, Lipoti Faaleausaga a le Pulega o Tusi Pasi ma Faailoga Taualoa 2019/2020.

**TULAFONO TAU FAAOFI O LE FAATATAUINA O TUPE  
FAAOPOOPO (NU.1) 2020/2021 – fefafolafoaiga faaauau  
i luga o le faiatauga faalua – Aso 14**

**FOFOGA FETALAI:** Ma lou faaaloalo, e tolopo Galuega a le Fono Aoao i le Aso Faraile i lena vaiaso ua tuanai ua maea ona saunoa le sui usufono mamalu mo le itumalo faaalaalafaga o Anoamaa Sisifo.

Ia, ua manatu o lea foi ua maua le avanoa mo se isi sui usufono mamalu e tulai mai e saunoa e tusa ai o le tatou Galuega.

Ia o lea ua tulai mai le Afioga i le Sao Faapito, o le sui usufono mo le itumalo o Lotofaga. Ia, e faatalofa atu i lau Afioga Honorable Fiame Naomi, lau Afioga i le Sao Faapito, saunoa ia. Ia manuia le saunoaga.

**Afioga Hon FIAME NAOMI MATAAFA (Lotofaga):** Faafetai i lau Afioga i le Fofoga Fetalai mo le avanoa. A o lenei itula, ou te talitonu e ui i le louloua o le tau, ua maleifua mai pea lenei Maota i le lagi e mama ma le soifua lelei, ua taitaiina mai tatou i le amataga o lenei vaiaso. Ou te faatalofa i lau Afioga i le Fofoga Fetalai, le paia o le Fono Faitulafono a Samoa, i le afio o lena Itu o le Malu i lau Afioga i le Palemia ma le mamalu o le Kapaneta, faapea Afioga i Minisita Lagolago.

E faapea foi lea Itu o le Maota i le afifio atu o Taitaifono o Komiti, ma sui usufono mamalu o le Palestene.

E faatalofa atu i le aufaigaluega a le Malo o lo o lagolago mai i le tatou galuega, le Afioga i le Failautusi o le Fono ma le aufaigaluega a le Ofisa o le Fono, faapea foi le mamalu o le vasega o Ofisa Sili o Pulega ma sui o Matagaluega ma Faalapotopotoga a le Malo.

E faapai atu foi ma le faaaloalo i le tapuaiga a Samoa i ona tulaga faalupe, paia faale-Malo, paia faaleaganuu, aemaise foi paia o le aufaigaluega totofi a le Atua i ona fatafitaaulaga e fia.

Lau Afioga i le Fofoga Fetalai, ae le i faia sina upu e uiga i le tatou mataupu o lo o i le Laulau a Fono, le Tala Faatatau o le Tupe (Nu.1), e ao foi ona faamauina le agaga o le faamaisega a lenei usugafono i le usugafono po o le tuumalo o le Afioga i le sui usufono le Afioga ia Vaafusuaga Toleafoa Ken Poutoa. Ia o le agaga foi lea e pei ona faaalia e le gata i lau Afioga i le aso na fofoga aloaia ai le tuua o le malo e le Afioga i le sui usufono, ae faapea foi i saunoaga ma fetalaiga a lenei Maota, aua ua faia se tasi o pou o le Maota Fono o Samoa, le alii, le uso a sui usufono. Ma o lea e momoli atu ai le agaga o le faamaisega i le faletua ma le nofo a alo aemaise foi aiga, tainane le itumalo ia Lefaga ma Faleaseela.

Ua maua foi i lenei faasologa o galuega i saunoaga faalauaitele i luga o le Tala o le Tupe Faaopoopo i saunoaga foi a sui usufono ua faapena ona faailo ai ma faamauina nisi o le tatou mafutaga nei o le a faapea ona tuua le auaunaga i le maea ai o lenei Nofoaga, e amata mai i lau Afioga i le Fofoga Fetalai, o nisi foi o sui usufono o le a faapea ona faamuta le auaunaga ma le tautua i le Malo e ala i le tofi o le sui usufono. Ma e ao foi ona matou piiama i finagalo faaalia i le molimoli atu o le agaga faamanuia, o moomooga alofa i le tuua o le galuega, aemaise foi o le mafutaga ua tausaga. Ia alofa le Atua ma faapea ona faamanuia i o outou faiva, ma e le taumate o lo o tele foi nisi feau ma valaauiina e faapena ona faaaauau ai lo outou galulue.

Lau Afioga i le Fofoga Fetalai, i le agaga lautele e lagolagoina e lenei usugafono le tatou Tala Faatatau Faaopoopo (Nu.1), aua o lau Afioga, ua tatou pasia le Tala Autu i lena tausaga, ua faataatia foi e le Afioga i le Minisita le Tala Faatatau Faaopoopo (Nu.1), ia, o lo o matauina ia o le fetuunaiga foi o nisi o vaega o le tamaoaiga po o tupe ua faasoa i le tulaga o lo o fia ave i ai le faamuamua, aemaise foi lenei vaitau i le luiina e le gata o Samoa ae faapea foi le lalolagi atoa i le aafiaga o le faamai o le Koviti ua faapena ona aafia ai le tamaoaiga.

Ma ou te manatu lau Afioga i le Fofoga Fetalai, e le tulagaese mai foi Samoa i le mea o lo o feagai nei ma le lalolagi. Ae i le tatou felafolafoai i luga o faiga faavae, e pei o le agaga lea lau Afioga i le Fofoga Fetalai, e fia tautalagia ai lava nisi o vaega e fai foi o le momoli atu o se mau, ia, po o le lagalaga foi o ni itu e ao ona tatou mafaufau faatasi i ai e fau ai se manuia o le tatou atunu.

O le mea muamua lau Afioga i le Fofoga Fetalai, ou te tautala i le itu lautele, ma e faapito se faamatalaga i le vaega foi lea o le tatou paketi, o le Budget Support, po o tupe fesoasoani o lo o tuuina mai e a tatou paaga e lagolago mai ai i le tatou Tala o le Tupe ma le galueaiina o le tamaoaiga o le tatou atunu. Ia, ou te lagona lau Afioga i le Fofoga Fetalai, o se vaega taua tele lea o le tatou Tala o le Tupe. Ma i le tuufafeagai o tupe fesoasoani nei ua tuusao mai i totonu o le tatou Tala o le Tupe, ou te manatu e moomia tele e tatou lea fesoasoani mai a tatou paaga aemaise i se tulaga o le oia po o le aafia o tatou tupe maua e ala mai lea i aafiaga o le tamaoaiga i le aoina lea o a tatou lafoga, ona ua faaletonu nisi o alaoa o lo o maua mai ai a tatou tupe.

Ma ou te manatu lau Afioga i le Fofoga Fetalai, ona o lenei vaega o tupe fesoasoani po o le Budget Support, e taua tele le manino ma le malamalam aemaise foi le Maota nei i lea vaegatupe o lo o galueaiina ai le tatou Tala o le Tupe, po o lo o galueaiina ai foi atinae.

Ou te iloa lau Afioga i le Fofoga Fetalai ma le mamalu o le Fono Faitulafono, o ituaiga fesoasoani nei, o Direct Budget Support po o fesoasoani tuusao i totonu o le Tala o le Tupe a le Malo o Samoa mai a tatou paaga, o se faiga lea ua fai mo fesoasoani tele mo tatou, aua a tuufafeagai le fesoasoani tuusao lea ma isi auala, ia o isi auala, o poloketi po o tupe

faameaalofa po o tupe nono faavaitaimi i se tului laitiiti, e i ai lava auala ma aiaiga e faafaigata ai. Ae ou te iloa i le faasolo mai o le tatou faigapaaga ma atunuu ma Faalapotopotoga o lo o lagolago mai i le Malo o Samoa, o se tasi lea o suiga po o faiga ua fesoasoani tele mo tatou. E fai foi la mo tatou, ae ou te manatu e faigofie foi mo i latou o e o lo o foaia mai po o tuuina mai ia fesoasoani mo tatou. Ae pau lava le mea e talatalanoa ai i le tatou felafolafoaiga lenei, ona o se vaega tele lea o le tupe o lo o aumai, a o le tupe e fesoasoani mai Malo ma Faalapotopotoga mai fafo, ou te talosaga atu i le Afioga i le Minisita, pe i ai se auala e manino atili ai, o ai o lo o auina mai ai, pe i ai ni aiaiga o i ai, pe faapito foi se manaoga o ia atunuu ma ia Faalapotopotoga i le faaaogaina o le latou fesoasoani.

Ae i ai foi le itu lau Afioga i le Fofoga Fetalai e ao foi ona tatou mataitu i ai, aua i le agai i luma o a tatou tupe maua, e mafai ona tatou faitau ma fai se ata faataitai, po o fea le mea e oo i ai le malosi o le alaoa ma le tupe e maua e le tatou Malo mai lea taimi i lea taimi, e ala i ana lafoga, ia ma isi foi alaoa o lo o faapena ona aoao mai ai tupe a le tatou Malo.

Ae o le tupe lenei, e fesoasoani i Tala o le Tupe, Direct Budget Support, o le mea e faafesili i lou mafaufau, pe i ai se mautinoa o lo o i ai i le agai i luma o le a tumau ai pe fua foi le fesoasoani mai i a tatou tupe maua. E pei o tulaga ia lau Afioga i le Fofoga Fetalai e le o manino ma e manatunatu pea i ai, aemaise i le faamautuina o se tamaoaiga, e faamautinoa ai le faagaoioiga o le Tala o le Tupe ma le atinae o le tatou atunuu. Ua matauina lava ua amata ona pau le tulaga o le tupe maua a lo tatou Malo e ala mai i a tatou alaoa masani. Ma e le taumate foi le mafuaaga o lena tulaga, ona o le faaletonu ma aafiaga o le tamaoaiga, aemaise foi le tapunia ma le vaea o nisi o tagata faigaluega o le tatou atunuu.

E pei o le itu muamua lea sa fia tautalagia i le tatou Tala o le Tupe lea, o le manino o le vaegatupe lea, aua e laitiiti ifo lava o le 50% o le tatou lava tupe, a o se vaegatupe tele, o se vaegatupe le mautinoa le maua, e ono tulai mai ai tatou i se faaletonu i se taimi o i luma.

E matauina foi lau Afioga i le Fofoga Fetalai i lalo o fesoasoani tau tupe ma poloketi, e ese foi le tele o tupe o lo o i ai i ina i totonu o le tatou Tala o le Tupe. Ia, o nisi o poloketi po o fesoasoani, grants, e tetele, a o nisi foi, e matauina e itiiti nisi o vaega. Ma e mafaufau lava i lenei taimi lau Afioga i le Fofoga Fetalai e tauala atu ai i le Afioga i le Minisita o Tupe, pe le o le tinoitupe lea o lo o tatou maua e ao ona toe silasila i ai i lenei lava vaitau po o le a se fetuunaiga e mafai ona pito aoga ona fesoasoani i ai ia tupe nei. E moni lava o le tele o ia tupe ua faamauina po ua faatulagaina lo latou faaaogaina, ae o se tulaga e avatu ai foi se tuualalo, pe le o se avanoa lelei lea e mafai ai foi ona fesoasoani ai mo tatou i se tamaoaiga e fesoasoani ai i lenei vaitaimi.

E fai ma faataitaiga lau Afioga i le Fofoga Fetalai, ua maua o lo o i ai se poloketi o lo o faatupe i lalo o le Matagaluega o Faatoaga i le totoina lea o

laau e fesoasoani ai e faafaigaluega nisi o tagata faigaluega ua vaea mai a latou galuega. E pei o se faataitaiga lelei lea lau Afioga i le Fofoga Fatalai, aua o le isi a tatou Matagaluega lea e tele alaoa e auala mai ai mo le fesoasoani e le gata mo le Matagaluega lava ia i mataupu ma matafaioi o lo o nafa ma le Matagaluega lea, ae ao foi ona fesootai i se tulaga e fesoasoani ai i le tatou tamaoaiga ma le tau aoaoina mai, e le gata i tupe a o galuega e faatupu mo lenei vaitau.

Ia, e pei e solosolo atu ai lava le talanoaga i le fesootaiga o le tamaoaiga ma vaega eseese o le galuega a le Malo i a tatou tupe maua. Ae pei e fia oo atu le tautalaga i le fesootaiga lea o le siosiomaga ma le tatou tamaoaiga. E le taumate lau Afioga i le Fofoga Fatalai o mataupu nei e 2 o lo o feagai ma le lalolagi ma tatou foi, o le suiga o le tau ma le tamaoaiga. O Samoa i le avea lea o se Malo i lalo o le itulagi o le Pasefika, o lo o fai lava le tatou itulagi ma avefua malosi e momoli atu ai le feau ma le mau i aafiaga ua oo i ai le tatou lalolagi ona o le suiga o le tau, i le tulaga foi lea e ui e itiiti lava se sao o le tatou itulagi i le faatupeina o kasa nei ua mafua ai le suiga o le tau, ae peitai, o le Pasefika i le tatou itulagi, o se vaega lea o le kelope ua aupito sili ona afaina i aafiaga o le suiga o le tau. Ia, ona manatunatu ai lea, aua o mataupu nei e 2 o lo o faafesagai nei ma Faigamalo ma pulega eseese, suiga o le tau ma le tamaoaiga.

Ma e i ai lava se lagona e tuu atu ai foi se tuualalo i le Malo i lau Afioga foi i le Minisita o Tupe, pe le ao ona tatou vaai i a tatou faiga faavae e mafai ai ona tatou galueaiina vaega nei o lo o luumi ai pea tatou i se auala e mafai ona tatou tali atu ai i aafiaga o le suiga o le tau, ma faapena foi ona tatou tali atu i manaoga o se tamaoaiga ua afaina. Ia, e tele lava tala i le faatupu o atinae i totonusi o mataupu tau siosiomaga, ou te manatu foi o se mea e ao ona tatou manatunatu i ai ma ave i ai le faataua.

A o ou i ai pea i i i le vaega lea o le siosiomaga ma le suiga o le tau, e tele foi nisi o saunoaga ma fetalaiga a le Maota ua faapena foi ona talanoaina, aemaise i aafiaga o le tatou siosiomaga, ona o le suiga o le tau, i le moomia ai lea o a tatou taligalu, o a tatou talivai, ia, ma isi lava vaega faapea o lo o moomia ai ma faatalosagaina pea e itumalo o le tatou atunu le fesoasoani atu a le tatou Malo. Na ou maua i le saunoaga a le Taitai, ua i ai se suiga laitiiti i faiga faavae a le Malo, e faatatau lea i taligalu, aemaise mo nuu ma afioaga, i le itu lea i le matau atu i le talosaga mai pea o tatou itumalo. Ma na ou maua foi i le saunoaga a le Taitai, ua faamanino lava galuega e mafai ona faatino i lalo o tupe e maua mai fafo, ia ma galuega e mafai ona faatino i tupe lava a tatou lava ia. Ma pe ou te tautala i fesoasoani i tupe mai fafo, ua matauina lava i fesoasoani e maua mai mo gaoioiga e tali atu i suiga o le tau, ia, o vaega e faaitiitia ai le faatupulaia o kasa oona, ia ma le isi vaega tele, e manaomia ai le faatinoga o ni poloketi tetele, o gaoioiga ia e toe faamalosia ai ma puipua o tatou laufanua, e i ai tatou taligalu, talivai, o tatou auala ma isi lava atinae tetele faapea.

Ua faamauina lau Afioga i le Fofoga Fetalai...

**Afioga Leaana Ronnie Posini (Safata Sisifo):** Lau Afioga i le Fofoga Fetalai...

**FOFOGA FETALAI:** Ia, malie ia lau Afioga i le sui usufono o lo o saunoa, se i tulai mai lava le sui usufono mo Safata.

**Afioga Leaana Ronnie Posini:** Faafetai tele i lau Afioga i le Fofoga Fetalai mo le avanoa. Faafetai tele foi i le saunoaga a le Afioga ia Fiame. E leaga e pei o le tasi lea mataupu na mamafa i ai se tala a lenei itumalo, o mea ia o taligalu, ae o lea ua faaloglogo atu o lea ua taua faiga faavae. Lau Afioga i le Fofoga Fetalai, e pei lava ona ou taua i le taimi ua sola, o lea sa agai mai nuu o le matou itumalo. E le i taua e Fiame ni faiga faavae sa i ai, ae na oo foi i le taimi i le tali mai o le Fono lea talu ai nei i le Tala Autu o le Tupe, e le i talanoa foi Fiame i ni faiga faavae, o la e i ai i faamaumauga. A o lea ua tau matau atu, o lea ua tau talanoa i saunoaga i faiga faavae. A na le talapelo le Afioga ia Fiame i le matou nuu, e talia e le matou nuu. E pau lana saunoaga lea na fai, ia tulai le matou nuu e agai i uta. E pei o le fesoasoani atu lea i le mataupu, ma le agaga faaaloalo.

**FOFOGA FETALAI:** Malo faafetai, atonu e sao foi le faauilavea, ae se i tulai mai pea lau Afioga leaga o lea sa e Minisita i le Matagaluega tonu lea e tulai mai ai le faafitauli, aemaise o le mataupu tau talivai.

**Afioga Hon FIAME NAOMI MATAAFA:** Lau Afioga, e pei e tau aiga lava le... e tau lalata lava le talapelo ma le avatu o le tala foi lea, e le fia talia. Ae soia ia, lau Afioga i le Fofoga Fetalai, e faaaauau atu le faamatalaga.

O ituaiga galuega la nei, e ui i lea, e fai ma faataitaiga le mau lea o le faiga faavae a le Malo, e ave le faamuamua i le puipuia o ana aseta. A leai, o le fautauga, ia agai tatou tagata i fanua maualuluga, ioe, e faapena ona faasao mai ai i aafiaga o le...

**FOFOGA FETALAI:** Malie lau Afioga Fiame se i toe tuu atu, o lea lava e nanau mai le finagalo o le sui usufono, leaga o lea sa mamafa foi i ai lana saunoaga faalauaitele e tusa ai ma le mataupu lea. Se i toe saunoa mai pe i ai se isi mea...

**Afioga Leaana Ronnie Posini:** Lau Afioga i le Fofoga Fetalai, o lea ua taua le upu lea talapelo. Ae silafia lelei e le Afioga ia Fiame, se na afifio mai nuu o le matou itumalo i le amataga o le Paeaiga lenei. Na matou faafesagai lelei, saunoa mai, se ua leva ona tatau ona fai tou taligalu. Ae o lea ua oo mai i le faaiuga o le Paeaiga,

**FOFOGA FETALAI:** Ia se i faamanino mai lau saunoaga, i le taimi a o Minisita o le Siosiomaga? Mo le faafogoa a le atunuu.

**Afioga Leaana Ronnie Posini:** Ia. e sao lelei lau Afioga i le taimi a o Minisita. Ae pei ua tau matau atu, e pei o lea o le a tau agai i faiga faavae, ae maumau pe ana saunoa mai i le taimi lena, i faiga faavae a le tatou atunuu. Ma le faaaloalo.

**FOFOGA FETALAI:** Malo. Ia, se i tulai mai pea le Afioga i le Sao Faapito.

**Afioga Hon FIAME NAOMI MATAAFAA:** Ia faafetai. O le a ea le mea o le a mafai ona fai e le sui usufono i le naunau mai o itumalo? Ia tuuai maia ia te au le le faia o taligalu o le itumalo, atonu o le a fofo ai le faafitauli o le Afioga i le sui usufono, le lē malilie o le itumalo.

Ae fai la ma faataitaiga, le tele foi o tatou afioaga ua faapena ona see ese mai nofoaga e latalata i le sami. Ia, e fai ma faataitaiga le itumalo o le Afioga i le Palemia, e tasi lea itumalo, aua o le moana ae tua i le papa. O le a la le mea ua fai? Ua fai le mea e tatau ona fai, ua siitia i nofoaga maualuluga. E pei la ou te avatu lena mau foi lea e pine ai le mea e ao ona mafaufau i ai. Pe le o le taimi lenei, taimi taulalata, taimi mamaao, ae o le suiga o le tau, e le o se mea e mafai pe i ai foi le malosi o le tatou Malo, e taofia ai le malosi o le natura ma le aafia ai o o tatou eleele, tafia ai o tatou matafaga ma o tatou nuu a tai.

Lau Afioga i le...

**FOFOGA FETALAI:** Ia malie lau Afioga i le Sao Faapito, se i tuu atu le avanoa i le sui usufono mo Palauli le Falefa.

**Afioga Hon Faumuina Tiatia Faaolatane Liuga (Palauli le Falefa):** Faafetai, e leai se agaga e fia faalavelave i le saunoaga matagofie a le Afioga i le Sao Faapito. E pau le mea o lea e fia faamalamalama o le faaupuga lea e faapea, e puipui e le Malo aseta a le Malo. O gataifale o aiga lea e expose i galu malolosi, o le responsibility lea a le Malo e fai, o la foi e silafia e le Sao Faapito na talosaga mai i lona taligalu, na fai. Na fai le taligalu o Vavau, fai foi le taligalu o Lotofaga, o le tele ia o taligalu na fai i lo'u taimi, e fai i lalo o tupe o le siosiomaga. O le mea la lea ou te fia faamalamalama atu, e le tatau ona puipuia na o aseta a le Malo, ae faapefea aseta a tagata taitoatasi? O fanua faale-aganuu lea o lo o afaina, ae tatau foi la ona toe sui le faiga faavae pe afai o le faiga faavae lea i le taimi nei, e aumai ai ni tupe i le vaega o le siosiomaga lea e feagai ma le puipuiga o aseta a le Malo ma aseta a le atunuu.

Ma lou faaaloalo.

**FOFOGA FETALAI:** Ia malo faafetai. Se i tulai mai Olo, pe i ai se mea... Salega i Sasae...

**Tofa Olo Fiti Afoa Vaai (Salega Sasae):** Leai o lea ua faamanino atoa mai e le Afioga e le Sao Faapito, ia tulaga o faiga faavae ia. Ma na o le pau lava lea o le faiga faavae o la e manino mai, o le puipuiga o aseta a le Malo, e pei o auala e lata i le sami. Sa Minisita foi o le Siosiomaga le Afioga ia Faumuina Liuga, e le i aumaia foi lava ma faamalamalama mai mea ia o le puipuiga o fanua faale-agantu. O isi foi la mea o mea ia o faiga faavae, na ou faalogologo atu o le tulaga i le sui usufono o Safata, se o le mea foi lea e tai 10 tausaga faatoa ota iloa ia mea. Leaga ou te iloa o la e fou lava si sui usufono, e le o malamalamalama tele i faiga faavae. Ma le faaaloalo.

**FOFOGA FETALAI:** E agai a outou faauilavea i le saunoaga a le Afioga i le Sao Faapito. Ae leai se mea o le a outou afea ai fua le faauilavea a le Afioga ia Faumuina, o le sui usufono o Paluli le Falefa. O a tatou Tulafono Tumau na, aua le faamisa i le misa ese. Ia tuu atu muamua le avanoa ia Faumuina.

**Tofa Hon Faumuina Tiatia Faaolatane Liuga:** Ia faafetai. Ou te iloa o la e silafia e Levaopolo, na talosaga mai i lona taligalu, na fai le taligalu o Saleaula. Na fai lava i le ooooga ona o le naunau e puipui aseta a tagata, a tagata taitoatasi. O lea foi la, e leai lava ma se isi na talosaga mai e le i faia se taligalu i lou taimi. E pau lava lea o le taligalu na alu alu le puipuiga o Safata, ona ua talosaga mai Safata, e fai le taligalu i le togatogo. Ona ou fai atu lea, o le togatogo o le natural protection lea o eleele, leaga e fananau ai ia, mo le taumafa o le atunu. Leaga o lea na fai taligalu o le Sao Faapito, o le manaia ia o le faiga o taligalu. Na ou alu atu foi fai mai, toe soosoo atu i o, ona matou o lava lea i le oneone, soosoo.

**FOFOGA FETALAI:** Ia ua e faafogfa mai la Levaopolo. Ae le i tausisia i faiga faavae ia na o aseta a le Malo.

**Tofa Hon Faumuina Tiatia Faaolatane Liuga:** O faiga faavae lava ia o le mea tau Siosiomaga. O le Faiga Faavae lea na saunoa i ai le Sao Faapito, o tupe e aumai e le World Bank e fai ai auala tetele. E ala la ona puipui auala tetele ina ia aua ne i toe afaina, le investment lea na fai ai e faaleleia ai auala. Ma lou faaaloalo.

**Afioga Leaana Ronnie Posini:** Lau Afioga i le Fofoga Fetalai...

**FOFOGA FETALAI:** Ua matua manino atoatoa. Se e faamalamalama lava e le au matutua le mea, malamalamalama.

Ia se i toe tulai mai lava, malie lava Fiame...

**Afioga Hon FIAME NAOMI MATAAFA:** Faafetai tele i lau Afioga i le Fofoga Fatalai. Ua uma foi le faauilavea o le itu lea, ae pei o lea o le a faauilavea le itu lea a, ia manaia lava.

Lau Afioga i le Fofoga Fatalai, ou te le iloa po o le a le mea lea e faauilavea. E le i uma, o lea e toe amata atu lau tala...

**FOFOGA FETALAI:** O ai e te faauilavea i ai?

**Afioga Leaana Ronnie Posini:** Lau Afioga i le Fofoga Fatalai, o lea ua taua lou igoa e le sui usufono lea o Salega,

**FOFOGA FETALAI:** Malie, o lea o le a oulua tauaimisa i le mataupu ae faamama lou suafa. E sao, o lea na taua oe e Levaopolo, ae le i toe faipule se Levaopolo na o Olo lea tatou te fai mea faatasi.

**Afioga Leaana Ronnie Posini:** Lau Afioga i le Fofoga Fatalai, o le ala lea o le taua o lau faalogologo atu i faauilavea ia na fai...

**Afioga Hon FIAME NAOMI MATAAFA:** Lau Afioga i le Fofoga Fatalai, o e faataga le faauilavea lea?

**FOFOGA FETALAI:** E leai ou te le faataga pe afai e faauilavea ia Levaopolo, ae afai o se isi mea e fia faamalamalama... ia malie ia Safata.

**Afioga Hon FIAME NAOMI MATAAFA:** Ia o le a faaaauau atu la matou mataupu.

**FOFOGA FETALAI:** Ia malie ia Safata.

**Afioga Leaana Ronnie Posini:** Lau Afioga i le Fofoga Fatalai, e toe faamalamalama le mataupu na saunoa i ai le Sao Faapito.

**FOFOGA FETALAI:** Ia malie ia, o lea ua e tulai mai. E leai e tuuaiina ai foi au, ae te le i... e le i malamalamalama lava le mataupu.

**Afioga Leaana Ronie Posini:** Lau Afioga o la e faalogologo mai lou itumalo, e taua i lou manatu le finagalo o lou itumalo na ou oo mai ai i totonu i nei. O le ala lea a taua loa, leaga e taua i le itumalo le... e tatau lava ona faaali so matou manatu i le mataupu ua taua.

Lau Afioga i le Fofoga Fatalai.

**FOFOGA FATALAI:** Malo. E leai e te le toe saunoa faalua... malie ia, se malie ia,

**Afioga Hon FIAME NAOMI MATAAFA:** Lau Afioga e mafai na ou faauilavea i le faauilavea.

**Afioga Sulamanaia Fetaiai Tauiliili Tuivasa (Vaimauga Sasae):** Lau Afioga i le Fofoga Fatalai, pe maua se avanoa o lenei itumalo.

**FOFOGA FATALAI:** Mo le a le mea e fia?

**Afioga Sulamanaia Fetaiai Tauiliili Tuivasa:** O se mea e fia faamalamalama lau Afioga.

**FOFOGA FATALAI:** E faamalamalama i le a?

**Afioga Sulamanaia Fetaiai Tauiliili Tuivasa:** I le lauga a le Afioga i le Sao Faapito.

**FOFOGA FATALAI:** Ia malie lau Afioga i le Sao Faapito, leaga o la e aafia i le tatou Tulafono Tumau. Se se i faanatinati mai oe le sui usufono mo Vaimauga.

**Afioga Sulamanaia Fetaiai Tauiliili Tuivasa:** O le itumalo lenei, e tumu i le ava i lenei foi sui usufono matua o le Palemene, ae leaga o lea e faalogologo lou itumalo i taligalu. O lea lava e inu le itumalo lenei i lafoga a le Sao Faapito sa fai i totonu o le Maota lenei, i talosaga lava nei o taligalu sa avatu ai e lenei sui usufono. O le a le saunoaga? O i uta, o i uta, e pei o le agaga lena o lea e toe avatu ai se manatu. E faafetai i le Afioga i le Palemia, o lea ua saunoa ma ua tali mai foi o le a fai taligalu o lenei nuu. Ae na ala ona tatalo atu lenei nuu i le taligalu, ona o soifua o tagata. Ae o le tala lea e pei e tuga i le faalogologo a lenei itumalo, fai mai e sefe aseta. E pei o le agaga lena, e faamuamua aseta ae faapefea le soifua o tagata ola? E pei la o le agaga lena lau Afioga, o lea la ua toe feau mea, a o lea sa saofai ai i o. E pei o le agaga lena, o le fiafiaga o lenei itumalo. O lea foi sa talosaga atu i le taligalu o le nuu lea o Laulii, o le nuu lea e fafati lava galu i tuamaota. Ae fai mai e o i uta, lea sa lafo lava i totonu o le Maota lenei, o lea sa lagona lava le faanoanoa i lena... Ae tumu i le ava i le Afioga lenei i le Sao Faapito, o lea la ua toe feau le tulaga lea sa i ai, ae pei o le agaga lena e pei, e faamuamua aseta ae faapefea le soifua o tagata. O soifua o tagata lea sa...

**FOFOGA FETALAI:** E na ona ou fesoasoani atu i lau Afioga, manatua o le saunoaga lena a le Sao Faapito i taimi o Minisita. O la foi ua sui le saunoaga a le Sao Faapito i le taimi nei, pei e faapena. Se o le common sense e faaaoga.

**Afioga Leaana Ronnie Posini:** Lau Afioga i le Fofoga Fatalai.

**FOFOGA FETALAI:** E le i uma lava lou ita.

**Afioga Leaana Ronnie Posini:** E leai o se mataupu e fia faamalamalama lau Afioga i le Fofoga Fatalai. E pau lava lea lau Afioga i le Fofoga Fatalai, e faanoanoa i le saunoaga a Olo e faapea, se i atoa le 10 tausaga ona faaali lea o se manatu. E le o le faiga lena na fai ai na aumai ai matou i totonu e itumalo. O le taimi na matou ulufale mai ai e faaali le manatu, ae o le mamafa o lou mafaufau, ona o la e punipuni mai e Olo ia Fiame. Ae afai o lea ua maua le talapelo o Fiame, ia o la lava e tautino e Fiame ua talapelo, ae tau punipuni fua e Olo. Ma le agaga faaloalo.

**FOFOGA FETALAI:** Ona ou te le o manatu ia Olo, leaga o la e faauilavea i le isi faauilavea.

**Afioga Hon FIAME NAOMI MATAAFA:** Lau Afioga i le Fofoga Fatalai, e ui lava e faafoliga e mama, ae fai lava sina tuga o lea mea o le fai mai o le isi sui usufono e pepelo le isi sui usufono. Ae o lea e i ai faamaumauga a le Palemene, o au tali na ave i ai, a o ou tu mai o.

**FOFOGA FETALAI:** Ia o lea se i tulai mai le Palemia, po o le a foi sona finagalo e faamalamalama le...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia):** Lau Afioga i le Fofoga Fatalai, ou te manatu ua manaia lava felafolafoaiga i lenei taeao aua o le malolosi o upu, e atili ai ona malamalama le lavelave o nei mea. O mea ia o faaiuga a le Malo, e pei e 2 lava faiga lautetele e mulimulitai e le Malo, o faaiuga e afua i luga o Tulafono, o le mea lea e tatau ona fai. A alu loa i luga o le Tulafono, e le mafai lava ona suia. Ae a alu loa i luga o policy, faiga faavae. O faiga faavae la na, e faataoto mai e le Kapaneta. E lua la auala e faatino ai faaiuga, e faaaoga le Tulafono pe faaaoga faiga faavae. Afai la e faaaoga loa faiga faavae, e i ai le uta fatalai, po o le tofa fatalai, o lona uiga e mafai ona sui. Ia malamalama lelei le itu lea, aua ne i i ai se lapse, e le faapea la e tulituliloa le Malo i se faiga faavae, aua o le faiga faavae e fetuutuunai, o le mea lena a le Malo mai lea taimi i lea taimi. E i ai foi la faiga faavae e faavae i luga o Tulafono. E faigata la ona fetuutuunai mea na,

a o le eseesege tetele lava ia. Policy may be changed, a faavae loa i luga o le Tulafono e faigata ona toe i ai se suiga. O le vaega muamua lena sa ou manatu e faamanino.

O le vaega lona lua, o le tofiga o le Palemia ma le Kapaneta, e manino foi Tulafono e faavae ai. A tofi e le Palemia lana Kapaneta, ona tuu atu foi lea e le Palemia i le Minisita ma lea Minisita ma lea Minisita tiute e tatau ona fai. O tiute foi a oo lava i mea lavelave e tatau lava ona aumai i totonu o le Kapaneta, ina ia saili muamua po o lava le tupe o i ai, e faapefea ona faatupe. O a foi Tulafono o lea e puipui ai? Lau Afioga i le Fofoga Fetalai, o lea la ua tau fai saunoa uma Minisita ia e toa-lua, o Minisita na ou tofia.

Na ou tofia muamua Faumuina e vaaia le Siosiomaga, ona uma lea o Faumuina ou tofia lea o Fiame e vaaia le Siosiomaga. Ae o lalo la i le Matagaluega lea o Fuagafanua ma Siosiomaga ma Suiga o le Tau, o le matua tele o tiute tauave. Ua ou le iloa pe 24 ea le aofai o mea ia o Pule Lagolago. Masalo o le Matagaluega lenei e pito sili ona tele, toeitiiti lava lavea se isi i se isi Pule Lagolago pau oti i le toatele naunau. Ae lipoti uma lava i luga o le Ofisa Sili o Pulega. O lalo uma o i latou o lea e saofai ai le Minisita i luga. E fesili foi le Minisita ia i latou i le mea e tatau ona fai, i luga o le latou foi tomai ua i ai, ma le faatinoga o le Tulafono o lo o faatonutonu ai a latou galuega. O au la lea, ou te tapa atu i le Minisita, vaai mea ia ma mea ia ma mea ia, o latou la e aumaia le fautuaga ia te au. Ma o le fautuaga la lea, o lea e sosolo ai foi le Kapaneta, mo mea nei o vaegatupe e aumai, aemaise lava la vaegatupe e aumai mai faletupe tetele o le lalolagi e faatupeina. E tatau ona puipuia aseta ia, afai o lea e fai auala e tatau ona puipui auala mai le osofaiga a suiga ia o le tau ma le malolosi o galu, ona o le suiga lea ua i ai le tau, e matua maoae lava. O lea foi la, ua atagia ai e pito i aafia lava atumotu o le Pasefika, ona o mea o motu. O isi motu e le i fausia mai i ni mauga mu, na fausia mai i aau, o aau. Ua tupu le...

**Afioga Hon FIAME NAOMI MATAAFA:** Faamolemole lava lau Afioga i le Fofoga Fetalai, po o faitau i i le taimi lavea foi lea le saunoaga a le Afioga Palemia i lata lauga e pei o le a uma le taimi.

**FOFOGA FETALAI:** E leai, e lavea i le taimi foi lele, o fautuaga i laufali.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e ala ona ou faamalamalama mea ia, ina ia malamalamalama lelei. Masalo ana malamalamalama lelei e leai foi se fetotoai. O le ala lena e taua ai le mea lea, ou te fesili i au Minisita, o le ala foi la lena, a alu ese loa le Minisita ua alu i fafo, ona ou faamafanaina loa lea o le Nofoa ma atili ai ona ou malamalamalama i mea la e fai. Lau Afioga i le Fofoga Fetalai, o le tulaga la lena, e i ai le taimi e fetuunai ai ia faiga faavae a le Malo, e le faapea e tamau. Ae o mea

la o lea e sau i fafo, aumai ai ma le faatonuga mai e ana tupe, e le mafai ona e laa i i, o mea la na e tamau, aua e te laa loa toe taofi ma le fesoasoani na aumai. E faapena uma lava fesoasoani e aumai i fafo, e leai se mea e mautinoa, o lea foi la na fesili ai le Sao Faapito, e leai ma se mea e mautinoa, aisea? Aua na ona faaletonu lava o le faatinoga tipi loa, tipi motu lava.

O le ala la lena, e tatau ona tatou logosaiga aiaiga e tatau ona mulimulitaia. A o le tofa fetalai lea e i le Malo, e le na o tupe mai se Faalapotopotoga e faatupe ai mea ia, e mafai foi ona faatupe ai ma taligalu. O le ala la lena o lea sa ou tulai atu ai. O le mea la lea, ou te faasaoa ai le mea lea, e le o se faiga faavae. Aisea? Aua o le mea lea o le common sense o le mea ua leva lava mai anamua. O le tofa fetalai, e fai ai galuega a le Malo. Ae ala ona ave le upu i mea nei o policy mai fafo, leaga o le vaega lea e ana tupe, e na ona leai lava o ni tupe tipi loa.

E pei foi la o le mea lea sa ou talanoa soo atu ai, i le mea lea o le faatupega o le tatou fale faatali pasese, o le matua lelei o le faatupega, o lena foi ua siitia ai femalagaaiga. E na ona tilotilo mai lava o tatou partners ua le fiafia i le mea lea e fai e le Malo, ia tipi loa. E toeitiiti 10 ea masina e le i toe tatala maia, ae ina ua avatu le justification, ua avatu le lipoti e tau atu ai le taua o le mea na fai, faatoa toe tatala mai foi lea. O lona uiga la, ua tali atu ai ma le isi vaega lea na saunoa i ai le Sao Faapito, o le a le tulaga o tupe ma le mautinoa. O le mea moni lava o fesoasoani mai fafo, e leai lava ma se mea e mautinoa. E faatoa mautinoa lava i le tausisia e tatou o taiala na aumai, ma le tilotilo mai o sologa lelei le faatinoga, e leai se faiga faaletonu o i ai, e leai se faiga faaletonu. E tai pei o le vaai mai, ua aumai a latou tupe ae tufa, e na ona sau lava o le mea lena tufa. O le mea lenei o le tufa, o le mea lena e mafaufau i ai le tamaitiiti e le i alu i le aoga. E manao lava i le mea e maua fua, le mea lea o le tufa, e mafaufau i ai le tagata paie, o le mea e maua fua atu le tufa. O le mea tonu lava lena, e vave tele ai ona tipi tupe ia e aumai i fafo.

Lau Afioga i le Fofoga Fetalai, o le tali lena.

**FOFOGA FETALAI:** Ia malo, ua manino atoatoa le saunoaga a le Palemia, se aua ne i toe faalavelave se isi i le saunoaga a le Sao Faapito. O lea ua faamalamalama le Palemia, ua manino la le tulaga o ia mea.

Tulai maia lau Afioga.

**Afioga Hon FIAME NAOMI MATAAFA:** Faafetai tele i lau Afioga. O le taimi foi o le lavea, po o le taimi foi o le fautua a le laufali. Atonu o lea lava tatou te... o ai pea faapena.

Ae faaauau atu la, ua ou faafetai lava i le tulai mai o le sui usufono o le itumalo o Palauli le Falefa e fesoasoani i le tulaga foi o le mataupu. I le mea lava lea i le faiga o taligalu, o faiga faavae, ma lona foi finagalo e ao foi ona ave le faamuamua e puipuia fanua o tagatanuu. Ia, e manaia le agaga, pe a

faapea o lava le tupe e fai ai. E sao lelei lava le sui usufono i le taimi foi a o tulai mai i le Matagaluega, sa faamanuiaina foi lenei itumalo i taligalu faatupe i poloketi mai fafo. I le taimi lena, o lo o talia le faiga sa fai e le Afioga i le Minisita, a ua solosolo foi ua fai sina umi o le va o le taimi sa Minisita ai le Afioga i le sui usufono ma lo matou foi taimi, ua tulaga ese foi le faiga faavae na aumai ai le fesoasoani. Atonu o lea foi ua fesoasoani mai i le mataupu a le sui usufono mo Safata. O le tali na ave i ai, ona o le togatogo, atonu e fai foi lena ma fesoasoani i le mafatiaga o le sui usufono mai Safata. Ai ua faapea le latou itumalo e le o faia lana galuega.

Faafetai tele i le Afioga i le Palemia ma le faamalamalama ae a tatou faaaogaina la le tali, o itumalo ia e pei e foliga o le a tali atu i ai le Malo, o Vaimauga Sasae, o Safata po o Anoamaa. Aua e pei o itumalo lava ia o lo o tagi mai pea. A faapea o lea o le a faamanuiaina, ua ou le iloa po o le suiga o le faiga faavae po o le common sense lea e saunoa mai i ai le Palemia, ae na ona pau lava le mea, o tupe a tatou o tupe a le atunuu, e faatulaga i luga o ni aiaiga ua faapena ona tatou faatatitia. Ia na o le pau lava le mea, faafetai pe a faapea e fai a outou taligalu e le i oo i le palota, aua o lea ua sui le faiga faavae a lo tatou Malo, e pei e sili ona ou see ese mai lea vaega.

**FOFOGA FETALAI:** See ese ia o lea ua uma ona faamanino e le Palemia.

**Afioga Hon FIAME NAOMI MATAAFA:** Ioe, ona ou oo mai ai lea...

**FOFOGA FETALAI:** Ona o lea sa e taua le Minisita o Tupe. Se i tulai mai le teuoloa a le Malo le Minisita o Tupe.

**Afioga Hon Sili Epa Tuioti (Minisita o Tupe):** Lau Afioga i le Fofoga Fetalai, ua ou faalavelave atu i le saunoaga matagofie a le Afioga i le Sao Faapito. Leai, e pei ona talanoaina foi e le Palemia le tulaga o le taua tele o a tatou... le faatupeina o le tatou Climate Change Priorities. O le isi vaega o lo o galulue ai nei le Matagaluega o Tupe ma le Faletupe o le Atinae o Samoa, o le tulaga lea o lo o taumafai, o lo o galulue, o lo o fai feutagaiga ma le Green Climate Fund, ina ia mafai ona tuu mai le avanoa i le tatou faletupe e mafai ona avea o se agent a le GCF, i totonu o le atunuu, ina ia mafai ai ona avanoa mai tupe ia e maua i le Green Climate Fund e mafai ai ona tatou tapenaina le tulaga ia, aemaise lava i tulaga o le fesuiaiga o le tau, lea ua afaina ai foi nuu nofo maualalo e pei foi o Safata ma latou na. E mafai ai ona maua mai i le GCF e auala mai i le Development Bank o le latou sui lea i totonu o le tatou atunuu, e mafai ai ona maua mai tupe e fesoasoani i le tulaga lea, ina ia mafai ai ona faatino nisi o galuega pito sili ona taua, aemaise lava i tulaga ia o seawalls ma tulaga faapena.

O lo o i ai foi, e pei ona saunoa le Palemia, ua i ai foi le tulaga, o lea foi ua talatalanoa le Malo, i le tulaga foi lea case by case, e mafai ai ona avatu tupe a le Malo, a tatou lava tupe e ave ai e faatino ai galuega ia e manaomia vave i le taimi lenei, aemaise lava nuu ma alalafaga ua afaina tele i le tulaga lea o le suiga o le tau. E talitonu i le paaga lea le GCF ma le Faletupe o Atinae, a maea ma manuia feutagaiga ia e fai nei, e masalo e tasi lena fesoasoani tele i o tatou itumalo ma alalafaga o lo o manaomia le fesoasoani lea. Ma le faaaloalo lava.

**Afioga Leaana Ronnie Posini:** Lau Afioga i le Fofoga Fetalai...

**FOFOGA FETALAI:** Se i toe tuu atu lava le avanoa, e naunau mai lava le sui usufono mo Safata...

**Afioga Leaana Ronnie Posini:** Faafetai tele lava i lau Afioga, ona e matau i le saunoaga a Fiame, e faapea mai o lea e taumafai e fai lou taligalu ae le i faia le palota. E pei e faauigalua ia saunoaga faapea. O mea ia o tofiga mai le Atua e totofi lava e le Atua sui usufono. E foliga mai e... o sau faatosina o fai... ua leva ona lauga mai le 2016 mai le mea lea o taligalu. Ae foliga mai e fai ae le i faia le palota, e pei o sau faatosina lau Afioga i le Fofoga Fetalai...

**Afioga Hon FIAME NAOMI MATAAFA:** E le faauigalua lau tala. E moni lau tala, talosia ia faia le taligalu o Safata, fai le taligalu o Vaimauga, fai le taligalu o Anoamaa ae le i faia le palota. Aua o la ua saunoa mai le Palemia, e faaaaoga tupe a le Malo e fai ai.

**FOFOGA FETALAI:** Se i tulai mai lava le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O lea ou te vaai atu e te le i faatagaina le Sao Faapito e tulai mai. O lea ou te fia faalogologo i le saunoaga a le sui usufono. Ia tu sasae ae lava le Sao Faapito faauilavea e te le i faataga. Pe mafai ona e faatonuina, se i taumafai e malamalamā i a tatou Tulafono Tumau, ua leva ona avea ma sui usufono ae le o malamalamā lava. O lea ou te fia faalogologo i le saunoaga lea e sau, ma o le mea... ou te le tau atua foi le taimi e fai ai.

Na ou faasilasilaina, e tatau ona fai, ma o lea ua i totonu o le polokalame, pe fai i luma mai pe fai i tua atu, o le mea sili ona taua, lea ua avatu le faasilasilaga a le Malo e fai leaga o le mea e tatau ona fai. Na ou vaai i ai leaga na ou asiiasi i ai ou tilotilo i ai i nuu nei e lua, ma e matua maoae lava le afaina. E le mafai la ona tuuloa, tuuloa le... o le mea lea o le fai o taligalu lau Afioga i le Fofoga Fetalai, e taofi mo le taimi nei, a o lea e faaauau pea

gaoioiga a Malo. O le mea e sili ona fiafia, o lea ua tulai mai, ua sui foi le faigamalo a Amerika, o lea ua toe i totonu i le taofiga o le fesuiaga o le tau, leaga o Malo tetele ia, lea e afua ai suiga. O lona uiga la, e tele lava le avanoa e ono toe faasaoina ai fesuiaga ia, ae faatoa mautinoa lelei le mea lea, o lea tatou te i le tausaga e 2021, faatoa mautinoa lelei ina ua tatou taunu i le 20 i le 100, toe 79 tausaga ona tatou taunu lea i le isi seneturi. O i ina lea e fua uma lava i ai mea uma ina ia oo atu i ina ua toe sau i lalo le vevela. O le tulaga lena o lenei taumafaiga e taumafai ina ia toe tuu mai i lalo le vevela o le lalolagi lea ua i ai nei.

O le tulaga lena o lea sa taumafai atu ai, o lea ua i ai le faaiuga a le tatou Malo ma le faamoemoe, e le taua le faiga palota lau Afioga i le Fofoga Fetalai, ae taua le faafogafoga mai o le itumalo o lea ua i ai le commitment a le tatou Malo. E le taua foi po o le a le iuga o le faiga palota, o lea ua i totonu o le polokalame, o lea ua faafogafoga mai le itumalo, e le o se faaiuga e faatemeteme ona fai.

**FOFOGA FETALAI:** Malo faafetai. Ia, se i fai muamua lava lau tala lea ona tulai mai ai lea o le sui usufono mo Anoamaa Sasa. Masalo o lea ua faamalieina lau Afioga i le sui usufono mo Safata Sisifo. Malo faafetai. Ia, e faapena, o le tuitui lava e tatala le faitotoa, ae tuitui ma tatalo. E faapena. Ioe.

Lau Afioga i le Palemia, e leai e lelei lava Fiame, ae ua ou vaai atu i o i... se o Olo foi la e faaoso, la e eueu lava Fiame e tulai mai i luga, a o Fiame e lelei tele Fiame i le tausiga i le va ma le Fofoga Fetalai.

O le mea la lea, se i tulai mai lava le sui usufono mo Anoamaa Sasa, lau Susuga Lufilufi.

**Afioga Alaiasa Muagututi'a Moefauouo Malagaitutogiai Sepulona Moananu (Anoamaa Sasa):** Faafetai i lau Afioga i le Fofoga Fetalai, o lea ua faalogologo ma le totoa i le saunoaga a le sui usufono o lo o saunoa le Afioga i le Sao Faapito. O saunoaga uma lava lea tatou te faia i le Maota, ia o la e faafogafoga mai o tatou itumalo, e eseese la le ituiga lagona foi ia, le respond a tatou itumalo.

I le saunoaga lea sa fai i le Maota e toe sii i uta tatou nuu, ou te oo atu i le matou Fono ae faapea mai toeaiina, ia, e tatau ona vaavaai se 5 piliona e siitia ai i uta le matou nuu. Ae ina ua ou alu atu talu ai nei ua saunoa le Minisita ua aafia ai ma le matou taligalu, ta te le i saofai atu a ua fiafia le nuu, faafetaia le faamoemoe o le Malo. Ia pei foi la ona saunoa le Palemia, pe fai i le palota pe uma le palota fai, ae ua matua faagaeetia lava le tapuaiga a le afioaga ona o lea o le a oo atu i ai le polokalame a le Malo. Ae faafetai, o le mea sili o lea o le a tatou faia se auala taugofie, nai lo le auala lea na ttau e sii i uta, ia e le iloa pe o fea e aumai ai ni tupe e fai ai. Ma le agaga faaaloalo.

**FOFOGA FETALAI:** Ia, malo faafetai. Ia, o lena ua taoto le ata o tauleleia ae taatia le ata o maluafiti e pei o le fetalaina i le Samoanagalo. Ia malo faafetai o la e faafofoga mai le itumalo. E i ai le manatu se aua e te toe mafaufau mamafa Fiame i mea o palota e totofi mai lava e le Atua. Ae saunoa mai oe i le tatou mataupu.

**Afioga Hon FIAME NAOMI MATAAFA:** Leai ou te le o manatu mamafa i palota, o lou manatu mamafa i taligalu. Faafetai lava i lau Afioga. Ia, e faamalulu atu foi i le saunoa mai o le Taitai o le Malo i le tutulai sasae. O le a ou le toe tu sasae atu, o lea o le a ou tu mamalu atu i luma o lau Afioga.

Ia, pe sili ia la ona ou see ese ma le mataupu lea, ou te fia see mai i le mataupu lea o fesoasoani mo Vaega Faaupufai. O lea ua maua i totonu o le Tala o le Tupe, o le \$200,000 sa faaagaga mo Vaega Faaupufai, ua toe faafoi mai i totonu o le Tala o le Tupe e le Vaega Faaupufai e Puipua Aia Tatau a Tagata. Ma ou te iloa lelei, sa ou i totonu o le Kapaneta i le taimi na fai ai le faaiuga lena. Ma ou te manatu, atonu e manaia foi lena faaiuga pe a fuafua i le manaomia o le tupe e faagaoioi ai le tatou Tala o le Tupe, aua o le agaga lena o lea e aumai ai i totonu o le Tala o le Tupe, e fesoasoani i le Tala o le Tupe le toe faafoi mai o le \$200,000. E ui la o lea lau Afioga i le Fofoga Fetalai, ou te manatu, e ese le taua o le i ai o se vaegatupe i totonu o le Tala o le Tupe e fesoasoani ai mo Vaega Faaupufai. I le faasologa lea ua tatou omai ai i lenei Nofoiga, e pei o le vaegatupe lava lea sa faaagaaga o le \$200,000 tuufafeagai ma faiga faavae foi lea ma Tulafono o le Aloaia o Vaega Faaupufai i totonu o le Palemene. O le mea moni, na o le tasi lava le Vaega Faaupufai. Ou te iloa ua \$800,000 la le tupe ua mafai ona faaagaaga i lenei Nofoiga mo Vaega Faaupufai, ae tasi lava le Vaega Faaupufai.

Ona tulai ai lea o le fesili lau Afioga i le Fofoga Fetalai, po o fea le mea lea e i ai se vaaiga o a tatou upufai, pe a faapea, aua o lea lava ua i ai Vaega Faaupufai i totonu o le atunu. O le Vaega Faaupufai na Puipua Aia Tatau a Tagata o le Vaega lea na muamua aloaia. Faasolo mai lava, faatulai mai lea Vaega Faaupufai, faatulai mai lea Vaega Faaupufai, o lea foi ua tatou oo mai i le faaiuga o lenei Paeaiga, ua tatou sauni mo le faiga palota i le masina o Aperila, ua i ai foi Vaega Faaupufai ua faapena ona faatulai mai.

O le manatu lau Afioga i le Fofoga Fetalai, a faapea o Vaega Faaupufai o se isi faiga lea e fesoasoani mo pulega faale-Malo, o le a le auala e faaaogaina ai le tamaoaiga o le Tala o le Tupe e fesoasoani ai i ia ituaiga tapenaga? Aua a tatou vaai i le tupe lea o lo o i ai nei ma le agaga na faatulai mai ai, o le fesoasoani mo Vaega Faaupufai. Ma e nofo le tupe lena i totonu o le Tala o le Tupe a le Ofisa o le Fono Faitulafono.

Ona ou manatu ai lea i le tatou agai i luma, tuu atu foi i le Malo, ia ma tatou uma foi aemaise o lo o tatou sauni atu mo le faiga palota, o le pulega lelei, good governance, o se mea e ao ona ave i ai se tatou faataua ma le faamuamua. A faapea foi o Vaega Faaupufai o se faiga po o se auala e

faatupu ai pulega lelei i totolu o se atunu, o le a le tatou mea e fai i a tatou faiga faavae i ituaiga fesoasoani nei e faatupu ai Faalapotopotoga nei. Ia, lau Afioga i le Fofoga Fetalai, o lea lava tatou te malamalamama uma, o au ua leva ona ou i ai i le Vaega Faaupufai e Puipuia Aia Tatau a Tagata, lea foi e afifio mai nisi o sui usufono, sa faapena ona auai atu i isi Vaega Faaupufai. A o le fesili; o le a le mea lea e tupu i Vaega Faaupufai i totolu o Samoa? O le a le mea ua le mafai ai ona ola Vaega Faaupufai e pei o isi Faigamalo?

Lau Afioga i le Fofoga Fetalai, e malie lava le mea pe a tatou tilotilo tatou i le talafaasolopito ma le tatou faigamalaga i mea nei e tau o Vaega Faaupufai. Na ou faalogo mai i le isi taeao o lo o talanoaina i le Maota Fono ma talanoaina ai le faasologa mai o le tatou Palemene, i le taimi foi lea faapea ae le i i ai le Vaega Faaupufai, a totofi loa le Palemia ma lana Kapaneta, ia e pei ua Itu Agai uma loa le Maota. E pei o se manatu foi lea na tupu ai, e taua le fai o Vaega Faaupufai e manino ai ma faataatia ni fuafuaga, ma o lea lava na muaimalae le Vaega Faaupufai e Puipuia Aia Tatau a Tagata e faia lena uiga ia manino lana avana, ia tuliloa i se Nofoaiga, ma faapena ona tau atu i le atunu, ia o mea ia na matou faia, mea lelei. Ia ua alu alu lau Afioga i le Fofoga Fetalai, o lea ua tatou oo i le tulaga ua na o le tasi lava le Vaega Faaupufai lea ua i totolu o le Maota o le atunu. Ia, e faatupu manatu ia te au, ua ou laga atu foi tatou te mafaufau uma i ai a o tatou agai atu i le faiga palota. O le a la le uiga o Vaega Faaupufai a ua le saofaga. O a mafuaaga ua le saofaga ai? Atonu e tele, e tele mafuaaga ua le saofaga ai le taumafai mai o isi Vaega Faaupufai, aua e le gata mai le Nofoaiga o le 2011 i le 2016 sa nofoia ai se isi Vaega ua aloaia i totolu o le Maota. Ia lau Afioga i le Fofoga Fetalai, a faapea ua tatou vaea se tamaoaiga mai totolu o a tatou tupe mo lea vaega, e avatu lava le tuualalo, e ao ona tatou toe tilotilo, pe tuu atu i le Ofisa o Faiga Palota, aua o lea ua moomia foi i le Tulafono ona resitalaina Vaega Faaupufai i le Komesina, ia, ma tapena ai auala e faaleleia ai le faiga o pulega, aemaise e ala atu i le faiga palota ma le gaoioiga foi a Vaega Faaupufai. Aua i lou lava mafaufau, o le mea lea e tupu ia tatou, e pei o Vaega Faaupufai ua patino lava i sui tauva, sui tauva. E faatoa vevesi lava i le taimi e fai ai le faiga palota e tau faamaopoopo mai ni sui ia po o le saili foi o le lagolago. A o le uiga lava ia o le Pati po o le Vaega Faaupufai i lau vaai i ai, e fai o le Vaega Faaupufai lea e tu i le Malo, a o isi foi Pati, e pei e lilifa lava e na o ē e tulai mai e avea ma sui o le Palemene. Ae peitai, e pei o le isi foi uiga o le Vaega Faaupufai, o se faalapotopotoga o tagata o le atunu e i ai o latou taofi i lea mea ma lea mea ma lea mea, o lea e avefua ai ma ave i ai le faamuamua a Vaega Faaupufai eseese. Ia, ne i te i ua umi naua se matou faamatalaga, a o le autu, e taua, ma e ao ona toe silasila i a tatou faiga faavae, o a tatou tupe, po o le a le auala e mafai ona tatou fesoasoani ai mo le faaleleia o pulega lelei i le tatou fesoasoani i Vaega Faaupufai.

Ona ou see mai ai lea lau Afioga i le Fofoga Fatalai i le Matagaluega o le Soifua Maloloina. O le Aso Sa atu i ona tua sa ou auai ai i se sauniga faamanatu na tapenaina e le Faalapotopotoga o le Kanesa, le gasegase o le Kanesa, le Cancer Society sa afio atu i ai le Afioga i le Tamaitai Minisita, e le gata o le Minisita o le Soifua Maloloina, a o ia foi ua faa-tina i le Faalapotopotoga.

Ua ala ona ou laga le Sosaiete o le Kanesa, ona o le agaga foi lea o le Malo i ana faiga faavae i faigapaaga. Ma e ave i ai le faataua, tausoa le galuega o auauanaga i totonu o le atunu i le faipaaga o le malo, Faalapotopotoga Tumaoti ia ma isi ituaiga faalapotopotoga faapena. Ia, ou te faamalie atu i le Afioga i le Minisita, e le o se agaga foi lea e faapea e faaleaga pe tauleagaina le auauanaga a le Matagaluega. A o le mea na ou vaai i ai i le aso lea, na o le Afioga lava i le Minisita na afio atu, e leai nisi tagata o le Matagaluega o le Soifua Maloloina sa i ai. Ia na afio atu le Afioga i le sui usufono ia Salausa, ia o le alii fomai foi. Ae ua ou nofo lava ma ou mafaufau ma ou vaai, ma e fai ma faataitaiga, aua e tupu foi le mea lea i isi foi faigapaaga ia e i ai i totonu o le Malo, tatou te tautala i le faigapaaga, a o ona faatinoga, e le o i ai. Ona ou mafaufau ai lava lea, o le a ea le mea tatou te talanoa ai i lenei mea o le faigapaaga, a o le a lona uiga? O a mea e ao ona faatino e iloa ai o lea e fai le faigapaaga lea? Ia, tau ia ina momoli atu le faamalo i le Afioga i le Tamaitai Minisita i lona lagolago i lea foi vaega o le atunu o lo o fesoasoani mai lana auauanaga mo le soifua maloloina, aemaise o le tuliloa o le fesoasoani i tagata o le atunu o lo o faapena ona maua i lenei gasegase o le kanesa.

Ae tatalo atu foi, aua e tele lava lipoti e maua mai ia tatou i lenei mea o le kanesa, lea e aumai ai lava le feau a le Faalapotopotoga lea, vave ona vaai, vave ona vaai. Aua e fai ma faamatalaga maua pea le tulaga lenei...

**Tofa Hon Faimalotoa Kika Iemaima Stowers (Minisita mo le Soifua Maloloina):** Lau Afioga i le Fofoga Fatalai...

**FOFOGA FETALAI:** Ia, malie le saunoaga...

**Afioga Hon FIAME NAOMI MATAAFA:** O le fai mai o tagata e o atu ua tuai. Pe faapefea ona tatou galulue pe a faapea e moni a tatou faigapaaga e tau tuu le mea lea, ua toatele tagata ua maliliu ona o le tuai.

**FOFOGA FETALAI:** Malo faafetai. Ia se i tulai mai le Minisita mo le Soifua Maloloina.

**Tofa Hon Faimalotoa Kika Iemaima Stowers:** E leai se agaga e faalavelaveina le sausaunoaga a le Afioga i le Sao Faapito. Ia, e moni lava, o le Aso Sa lea sa valaau mai ai, na aumai foi le tusi mai le Sosaiete a le

Kanese ina ia mafai ona ou auai atu i le sauniga lotu lea e tapuai faatasi ai foi auaunaga o lo o faapea ona galulue faatasi ai lea foi vaega ma lagolago mai ai i le tatou Malo e ala i le Matagaluega o le Soifua Maloloina i togafitiga ma auaunaga mo i latou ua aafia i lenei foi faamai o le kanesa.

Ia, ae ou te talitonu, o lea foi afiafi, ou te iloa sa auai atu ai le Faatonu Sili ma nisi o vaega, ou te le iloa pe na maua ni tusi valaau o le isi au vaega, ae o lea foi tatou te i ai i le tau tulimatai ma le mautinoa, o lo o lelei nofoaga foi ia, aua e oo lava i Aso Toonai, Aso Sa, po le ao, e faapena ona o atu i ai le Matagaluega. E le o se alofaga, ae sa ou talanoa i le Ofisa Sili o Pulega, sa ma i ai ma si toeaina o Salausa, sa fai maua ma sui o le tatou Matagaluega, ae ona o le tele o isi auaunaga ma le tulimatai o galuega mo le puipuiga o le tatou atunu, o se tasi lea o vaega na mafua ai i lana faamatala mai, ona sa toesea i nisi ia vaega o le puipuiga. Ia e pei o se faamatalaga lena i te i ua faapea o tuumamaina i lou tali atu i le tele o faafetai foi o lo o aumai e le toatele ma sausaunoa mai i ai sui usufono o lea e oo mai i le taimi nei o lo o faapena ona manuia pea si o tatou atunu. Ou te molimau atu ma le agaga ootia i isi taimi, aemaise o le vaega o le po, o le vaveao, e le o faatumutumulima pe faapaole le auaunaga o lo o faia nei. O sau molimau atu lena e tali atu ai i nisi o faafesili i lenei Matagaluega.

O nisi foi taimi ou te popole pe a te i ua collapse faafuasei tagata nei e taiulu e le lava le aufaigaluega ma tulaga e ao ona i ai, ona ou popole ai lea po o ai o le a tulai mai. Ou te fia manao e lava le latou malolo, o le soifua o le atunu o lo o feagai ma nei tamalii, aemaise o alo ma fanau a Samoa o lo o galulue i totonu o le Matagaluega, e faapea foi le mamalu o le aufaigaluega a le Malo. Faafetai i a latou i le tautua malo ma le tautua atunu. E mamafa ia i lou mafaufau le tulaga lea o le lava o le malolo a le aufaigaluega. Ia, ma lou agaga faaaloalo lau Afioga i le Fofoga Fetalai.

**FOFOGA FETALAI:** Malo. Ou te fia fesoasoani atu i le sui usufono mamalu o lo o saunoa. Faafetai o lena ua manino lea vaega i le saunoaga a le Afioga i le Minisita mo le Soifua Maloloina, leaga o lea sa taua e le Afioga i le Sao Faapito le tulaga o Vaega Faaupufai, na fai si umi foi o le saunoaga agai i le itu lea, a o le mataupu lea o lo o faapena ona faailoa e tatou Tulafono Tumau. Ne i le oo i ai sau faamalamalamaga, ia ona tuuaiina lea o le Nofoa ua ou le faamaninoa le tiute lea. Ae ou te augata ou te faia se tala e faauilavea i se saunoaga a se sui usufono pe a saunoa lava i le tulaga e pei ona taua mataupu eseese, faiga faavae ma tulaga o le aotelega o mea tau le tamaoaiga. Ae ona o lea ua taua le tulaga o Vaega Faaupufai, ia po o le a le tele o Vaega Faaupufai e faatutu ma resitala i le tulaga masani i le Ofisa o le Komesina o Faiga Palota, ae faatoa aloaia lava i le tulaga o le tatou Maota lenei pe a atoa le numera lea e pei ona i ai. Ia pei o i ina e fua i ai le tulaga lea.

O Vaega Faaupufai, e pei e faapea, aua sa tau... ia e faapea lava ta ita ua leva ona e silafia le agaga tonu ma le lelei o le mautu o le Vaega Faaupufai.

A mautu le Vaega Faaupufai, ua mautu le Faigamalo. O le talitonuga lena, aua e le mafai e se vaega toaitiiti, ia o le a faapefea ona taumafai e faamautu le 51 sui usufono pe 50 sui usufono o le Palemene, e oo lava i le toa-iva e le mafai ona faamaopoopo? O le fesili lena e fesili i ai le atunu, ma o le fesili foi lena sa saunoa i ai Taitai i tua atu o i tatou. Ioe, a faapefea ona asosi... tasi lea upu na faaaoga. E faapefea ona asosi e se vaega toaitiiti latou te faamaopoopo le... i le taimi foi lea o 49 sui usufono, le 49 sui usufono, o lea ua 50. Le 50 sui usufono o le Palemene ae oo lava i le toa-valu ma le toa-iva e le mafai. Ioe. O le tulaga lena Fiame, faapea ai o e silafia ua leva ona tatou i inei. Ioe.

Ae o le isi vaega, a mautu le Vaega Faaupufai, ua mautu le Faigamalo. A mautu le Faigamalo, ua manuia Samoa, ua tatou maua le faatuatuaga o atunu mai fafo latou te agalelei ma foai mai ai le latou fesoasoani e atiae ai si o tatou atunu. Ia a o ai le Malo mai fafo e foai mai ae vaai mai na o le toa-valu? E faapena, e sili ona tuu i le moana ae tiai i tai i le moana ae ave e fesoasoani aua... ioe. E pei e faapena.

Ae talu ai ona o lea ua tatou taunu i le tatou malologa, o le a faataatiae Galuega a le Fono Aoao mo lana malologa masani. Faafetai.

*Na faataatiae Taualumaga a le Fono Aoao Faitulafono mo lana malologa masani i le itula e 10:46 i le taeao ma toe faaauau i le itula e 11:36 i le taeao.*

*Na toe faaauau felafolafoaiga i luga o le faiatuga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.*

**FOFOGA FETALAI:** Ou te faasilasila atu ua toe amatalia Taualumaga ma Galuega a le Fono Aoao Faitulafono. Ia, malo le onosai i le paia o sui usufono mamalu ae faapea foi Ofisa Sili o Pulega o Matagaluega ma Faalapotopotoga a le Malo ma le Ofisa o le Fono. Faafetai mo le malosi faaopoopo e faaauau ai le tatou Fonotaga.

E faia le malologa o saunoa le Afioga i le Sao Faapito Honorable Fiame, ma ou te tapa le sui usufono mamalu, tulai mai ua le o toe tele foi sou taimi ua faasolo ina faaiu le taimi faatulafonoina o lau Afioga.

**Afioga Hon FIAME NAOMI MATAAFA:** Ia, faafetai tele i lau Afioga...

**FOFOGA FETALAI:** Se i malie lau Afioga Fiame se i tulai mai lava le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fatalai, e le taumatea ua faafogafoga foi le Maota i le tapenaga a le Afioga i le Sao Faapito o le sa avea ma Sui Palemia. Ou te lagona e tele foi le sao o le Tamaitai sui usufono i tatou felafolafoaiga, o lea e i ai le taofi, o le a sou finagalo ae tuuavanoa pea se i maea lelei lana saunoaga. O lea lava ua matau atu i tulaga foi o saunoaga uma a sui usufono o lea lava ua tuu lava se i maea lelei a latou tapenaga, ia o le tatou toe Fono foi lenei o lenei Paeaiga. O se faaoloolomaau lena i lau Afioga.

**FOFOGA FETALAI:** Malo faafetai. O lea ua saunoa mai le Taitai o le Maota ina ia faapena ona maua se avanoa e faamaea ai le saunoaga a le Afioga i le Sao Faapito, o nai a tatou toe saunoaga lea o lenei foi Paeaiga. Ma e manatu le Nofoa, e momoli atu le faafetai i lau Afioga i le Taitai o le Maota mo lou finagalo, ia ma o le a faapena ona fai.

Ia, tulai maia lau Afioga i le Sao Faapito e faaaauau lau saunoaga.

**Afioga Hon FIAME NAOMI MATAAFAA:** Faafetai lava i lau Afioga i le Fofoga Fatalai, ua matu foi fau i le taliga o le sua i lau Afioga ma le mamalu o le Fono a le Palestina. E molimoli atu le faafetai i le Susuga i le Failautusi ma le tatou Ofisa o le Fono mo le tapenaga foi o le taumafataga aua foi se faasiliga malosi o le usugafono. Faafetai. Ia, faafetai i lau Afioga i le Fofoga Fatalai mo le avanoa. Faafetai atu i le Afioga i le Palestina i lona finagalo ua folasia, ia, ae lau Afioga, ia sa tau fuafua mai lava i le taimi faatulagaina, fuafua ma taimi o lavea pei ona e saunoa injured time ma fautuaga foi a le laufali, pei foi ona saunoa lau Afioga. Ae ailoga i se a e toe umi naua, ae faafetai tele i le faaaloalo a le Afioga i le Palestina, i le amanaia foi o se taofi o lenei usugafono.

E maea le tatou Fonotaga o e saunoa mai i le Nofoa e tusa ai ma le mataupu sa ou lagaina atu i faiga faavae. Ia taatia maia le finagalo o lau Afioga, e sao lava au, ua leva lava ona tatou i ai uma i faiga faaupufai ma Vaega Faaupufai, ae atonu o lena e faamaumauina i faamaumauga a le tatou Fono le agaga sa momoli atu ai le mau e tusa ai ma le atinaeina o tulaga o Upufai, e tauala lea i le faamalosia po o le poupoa o Vaega Faaupufai. A fua foi i le tamaoaiga i lenei Nofoaiga, toe miliona tala se tamaoaiga sa vavae mo Vaega Faaupufai. E pei ona saunoa lau Afioga, e tatau ona tutua, pe a faapea ua maua se na vaegatupe e fesoasoani ai i le Vaega Faaupufai o le miliona tala.

Ae ou te toe foi mai i le Matagaluega o le Soifua Maloloina, faafetai i le Minisita mo lana faauilavea. O le mataupu sa ou...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fatalai.

**FOFOGA FETALAI:** Ia faamalie atu i lau Afioga i le Sao Faapito, se i tulai mai le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** E leaga o lea e taua le miliona tala e fesoasoani mo Vaega Faaupufai. E umi lava lau tautalaga i le vaega lea e faamalamalama i le taimi ou te lauga ai. Ae o au lea e tau te i atu po o le a le miliona lea e tau. E pei o le tulaga lena, o lea e... leaga foi o tatou e matau lelei lava upu, leaga ua ou faalogo i ai i taitaiseseina ai le matau mai a tagata. Ae umi lava lau faamalamalamaga pe a oo mai i le taimi ou te talanoa ai i mataupu ia.

**FOFOGA FETALAI:** Ia malo faafetai. Ia se i tulai mai lau Afioga i le Sao Faapito.

**Afioga Hon FIAME NAOMI MATAAFA:** Faafetai i lau Afioga i le Fofoga Fatalai. Ona faaaauau atu ai lea o le mataupu i le Soifua Maloloina, i le agaga foi lea o faiga faapaaga, e pei ona tautalagia ai foi le Sosaiete o le Kanesa. Ae i ai foi le isi Faalapotopotoga sa faatulai mai foi, e pei o le Health Foundation foi, e pei o le agaga lava lena, ina ia faatupulia ni auaunaga i tua atu o le Matagaluega, ae galulue faatasi foi ma le Matagaluega, ina ia faaleleia atili le auaunaga. Ae o lea e le o maua foi po o fea ua oo i ai lena Faalapotopotoga sa ave foi i ai le faataua ma le faamuamua.

Ae pau lava le mea e fia avatu ai le tuualalo i le Afioga i le Tamaitai Minisita, e pei e faapitoaugafa le faamatalaga i le Sosaiete o le Kanesa leaga o lea ou te malamalama i ai. O le galuega foi lea ma le auaunaga a le Faalapotopotoga, e i ai foi a latou tagata faigaluega e i ai ni tomai faale-soifua maloloina. Ae peitai ona o faiga faavae po o Tulafono pe a, e le o mafai ai ona faatino le auaunaga foi lea e momoli atu i aiga, ma nofoaga o i latou o lo o aafia ona e faapea, e le o se matafaioi lea e ao ona faatino e se Faalapotopotoga.

O le talosaga la ma le tuualalo i le Afioga i le Tamaitai Minisita, a faapea e i ai a tatou Faalapotopotoga nei, e faapitoa i le Soifua Maloloina ae i ai ni latou tagata faigaluega, e pei o fomai, tamaitai tausi soifua. Pe i ai se faiga e mafai ai, po o le Tulafono, po o le faamaonia o resitala, o a uma Tulafono, e mafai ai ona tuuina atu le mafai e faatino ai le auaunaga e ia foi Faalapotopotoga. Ou te manatu, o se fesoasoani lea i le faataunu o auaunaga i totonu o le atunu. Ia, e pei o se talosaga lena ma se tuualalo e tuuina atu i le Afioga i le Tamaitai Minisita o le Soifua Maloloina.

**FOFOGA FETALAI:** Ia malie lava lau Afioga i le Sao Faapito, o lo o tulai mai le faauilavae a le Afioga i le Tamaitai Minisita o le Soifua Maloloina. Tulai mai lau Afioga i le Tamaitai Minisita.

**Tofa Hon Faimalotoa Kika Iemaima Stowers:** Lau Afioga i le Fofoga Fetalai, o se mea e fia faamalamalama. O faigapaaga a le Malo e ala atu i le Matagaluega o le Soifua Maloloina ma le tele o vaega nei matou te faipaaga, o lo o faapena ona mafanafana ma matou galulue faatasi e ala i le matou talanoa ma faasoa. O lea foi sa fai le Health Sector talu ai, sa faapena ona tufa ma faasoa vaega eseese o lo o galulue faatasi ma le Soifua Maloloina, mo le tuuina atu o le auaunaga i nuu i tua. E tai pei foi la o le faataitaiga e pei ona amata mai ai le saunoaga a le Sao Faapito le Cancer Society. O lo o galulue i taimi uma, o lo o faafogafoga mai foi i latou i le taimi lenei, o lo o i ai foi seleni o lo o faapena ona tuuina atu e le Matagaluega e fesoasoani i le faatinoga o galuega a matou paaga. E ala ona leai nisi, ae o taimi uma e valaau mai ai, ou te tu ma ou alu. E tai pei foi la ona ou auai i le lotu lea sa fai muamua. Na ou faapea lava au ia, a ou i ai, o au o le Faauluuluga o le Matagaluega ae tuu le aufaigaluega E pei o le ala lena o lea e tau fai atu ai se faamatalaga. Ou te le iloa po o fea le mea o i ai, e le o i ai foi se complaint a le matou paaga lea matou te fai paaga ua matou le ano atu. O lo o faapena ona mafana lava mafutaga ma le faasoa i mea o lo o manaomia, mo le latou foi auaunaga. O lea foi na ou faafetai ai, i le tuu mai o le latou tauau matou te galulue faatasi. O le tele foi o taimi e fesoasoani foi, o lea foi ou te manatua, sa fesoasoani foi nisi o le Maota nei, i isi foi sailiga seleni mo paaga, e pei la o le Cancer Society. O lea ou te manatua, sa sele ai foi, tulou le gagana, le ao o le Afioga i le Palemia ma nisi o Minisita o le Kapeneta, o le sailiga o seleni aua faamoemoe mo i latou o lo o fesoasoani malosi mai. E leai ma se taimi e faapea ua tete ai e le Soifua Maloloina se mea aoga ma ni mea taua, e mafai ai ona galulue faatasi.

O lau faafetai lea i le atunu, aemaise o i latou o lo o tutu malosi mai e lagolago le galuega faa-Soifua Maloloina. Aua o le soifua ma le ola o Samoa o le focus lena o lo o ave i ai galuega uma a le Matagaluega i le taimi nei e pei foi ona i ai le taimi nei i le Koviti-19, o le focus o le puipuia o le soifua o Samoa, mai so o se aafiaga. E prioritise foi galuega a le Matagaluega, a le lava le aufaigaluega, faaalu le vaega a le A, taeao po o le vaiaso lea alu le vaega a le B, ina ia tau faasoaso resources. E le gata o tagata a o meafaigaluega e matou te galulue faatasi ai ma a matou paaga. Ou te faamalulu atu, aua o le tele o mea talu ona ou tulai mai au ia i le Matagaluega, ma ou alu i ai pe a valaau mai i taimi uma.

Ia e faafetai atu i le Afioga i le Sao Faapito, o se taimi muamua lea ua ou vaai ai i se mea tau kanesa, talu ona ou tulai mai au ia. Faafetai o lea sa ou vaai sa auai, ae o lo o taumafai i le tulaga aupito sili i galuega a le

Matagaluega e fuafua i resources o lo o maua e faatino ai le galuega. Ma lou agaga faaaloalo.

**FOFOGA FETALAI:** Ia malo, e masalo o galo i le... ma tatou te tau fai manatua, o le taimi lea, pau lava lea o se Palemia o se atunu, na selemole lona ao, tulou, selemole lona ao mo se sailiga o se seleni aua le Faalapotopotoga. E le galo foi lena taimi, ae malo faafetai. O lea ua toe fafagu mai le tulaga o le agaga aua e seasea ona maua. E le maua lava i se isi atunu o le lalolagi le selemole o se ao o se Palemia ona o le sailiga o ni tupe aua se Faalapotopotoga. Ae momoli le faafetai, e manatua taē o i Atua tulou, i sala le gagana. Ae na ona faamanatu atu i le Afioga i le Sao Faapito, saunoa i itu ia e le maua gofie, e sau i le taele o le fatu le lagolago ina ia faapena ona... o tatou uma lava, tatou te togimaa uma i le tulaga o le faamoemoe aua tatou te au i le tauola e au i le fagota e pei o lea muagagana. Ae ui i lea, o lena ua manino nisi o mea na saunoa i ai le Minisita, ae tulai maia lau Afioga...

Oi, malie lava lau Afioga i le Sao Faapito se i tulai mai le sui usufono o Faleata Sasae se i saunoa, Salausa, lau susuga i le fomai.

**Afioga Salausa John Ah Ching (Faleata Sasae):** Faafetai. E na o se mea lava e fia faamalamalama atili. Faafetai foi i le Sao Faapito i le taulagalaga i nisi o mataupu e ao ona faamalamalama atili aua foi le silafia e le atunu o lo o faafogfa mai. E taua lava le mea lea sa taua o le partnership po o le fai faapaaga o galuega ma le mea lea sa saunoa i ai le Sao Faapito ina ia tuu atu le avanoa i sui foi o le Faalapotopotoga o le Kanesa ua i ai le tomai, e fai ai foi e latou ni aoaoga po o ni faamalamalamaga.

O le mea lea ou te iloa, aua o le lotu lea a le Kanesa sa fai talu ai nei, na ou alu i ai o lou tusi valaaulia, e fai ma sui o le Matagaluega o Tina ma Tamaitai, i lea foi faigalotu. O galuega la faipaaga foi a le Matagaluega o Tina ma Tamaitai, e tele ina matou o ai i tua, e o uma lava le Sector atoa lea, e o atu ai foi ma le Health Sector, e i ai uma lava Faalapotopotoga. Matou te o ai ma le Kanesa, o le Red Cross, o le Fiamalamalama, o le Faataua le Ola, o vaega uma lava ia matou te o faatasi, pe a matou o atu i tua e fai aoaoga i tua. O le fai paaga la lena, o lo o faaauau lava. Mo le... ina ia malamalamaga atili ai, o lo o faaauau lava, a o lea foi ua toe faataua mai i le saunoaga, e faataua ai pea le mea lea o le faaauau lava o le faipaaga lea a Sectors eseese uma. Aua e tau le Sector pe toa-valu pe toa-sefulu ia Matagaluega eseese e i ai i totonu o le Sector. O le Sector a le Health, o le Sector foi a Tina ma Tamaitai, o le Sector foi a le Heath Education, e faapena lava. Faafetai mo le avanoa.

**FOFOGA FETALAI:** Malo faafetai. Ia Se i tulai mai le Minisita o Aoga.

**Afioga Hon Loau Solamalemalo Keneti Sio (Minisita mo Aoga, Taaloga ma Aganuu):** E faafetai tele lava mo le avanoa, o lea ua e taua ma e saunoa foi i le tulaga lea o le Kanesa, e pei ona e faamalamalamaina le tele o le sao o le Afioga i le Palemia, e faapena ona faafuga ai lona ao aua le faamoemoe lea.

E na ona ou fonofaapipii lau Afioga, ona o la e faalogologo mai si ou itumalo, ma lou nuu leaga na fesiligia ai au, ou te alu atu i le fono a lo matou nuu ua poo uma lou ulu se i tulou. Ae le gata i lea ua leai ma ni ou fulufulumata, ioe. Ae ona o le taua lava o le tulaga lea, na faapena ona... leaga o la e faalogologo mai, faapea le matou nuu, ma le itumalo, ai na o le Afioga i le Palemia na faafuga lona ao, a o maua ma le Afioga ia Afamasaga. E toeitiiti lava maua le \$50,000 o le tupe na ma suea, e fesoasoani ai i i i le Faalapotopotoga lea, aua le faataua o le mea lea e lauga i ai le Afioga i le Sao Faapito. A o le auga lau Afioga, o le faamoemoe, o le mea e mafua ai le cancer. Ioe. E pei o i ina na ma maua mai ai le taua o le tulaga lea. O le faataua o le mea na mafua mai ai le cancer ma le toatele o e o lo o aafia i totonu o le tatou atunuu, ona o le kanesa. O le taumafa tapaa, ioe, o lona auga pito sili lea ona ogaoga, o le e taumafa tapaa. E le gata la ina e alu e faalauiloa, ma e savali ai, pe a faapea foi e te saunoa ai, savali ai ina ia tuu ma tuuitiitia le taumafa tapaa, ona le maua lea o le tatou atunuu i le kanesa.

E pei ona ou faamalamalama o se mea e fia faamalamalama atili, leaga o la e faalogologo mai le itumalo. Fai mai tala a toeaiina, “Loau o le mea ea, o oe ua faaletonu, o le a le mea ua selepoo ai faapena lou ulu.” Ou taua lea i ai, o lea la ua faafogoa mai, e leai o le kanesa ua mafua ai. Ma le agaga faaaloalo.

**FOFOGA FETALAI:** Ia se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e pau lava le mea ou te fesiligia ai, aua o tagata uma lava e auai i le mea lea, o tagata e fia maua se tulaga foi lele e alu ese ai ma le mea e mafua ai ona tupu le kanesa, o le tulaga lena e taua tele. O lau fesili atu i le Minisita o Aoga, ua tuu lou ula tapaa?

**FOFOGA FETALAI:** Ia se i... talofa... leaga o lea e...

**Afioga Hon Loau Solamalemalo Keneti Sio:** Ioe, o au e leai se mea valea o le lalolagi lenei ou te le i faia, o le tala moni lava lena. Ae pau lava lea o le mea valea ou te le i faia faatasi, ae ua ou faia uma lava mea valea. E na o le ulaula lava ou te le i faia. Ma le agaga faaaloalo.

**FOFOGA FETALAI:** Ia se i tulai mai le Minisita o Tina ma Tamaitai.

**Afioga Hon Tuitama Talalelei Tuitama (Minisita o Tina & Tamaitai Atinae o Nuu ma Afioaga ma Agafesootai):** E fia fesoasoani atu i le mataupu lea, ua taua le vaega o le mafuaaga o le cancer. Ou te fia talanoa la i ai i le vaega lea, ae mafai ona ou faapuupuu atu e faapea, o le mau a alii popoto matautia o le lalolagi i nei lava mea tau kanesa. E faapea la latou mau, “everything under the sun, including the sun itself can cause cancer.” O le faapuupuuga lena.

**FOFOGA FETALAI:** Ia malo. Ia se i tulai mai le Afioga i le Sao Faapito.

**Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese):** Lau Afioga i le Fofoga Fatalai, se avanoa faamolemole.

**Afioga Hon FIAME NAOMI MATAAFA:** Ua ou le iloa i le saunoaga a le Palemia e aumai lou avanoa e faaaauai ai lau lauga, pe o le mea moni lava. Se i fai uma ai faauilavea a le Kapaneta ma aumai ai lo latou silafia i le mataupu, ae tuu le lauga a le sui usufono o lea ua maua mai le avanoa.

**FOFOGA FETALAI:** E sao lava oe, ae toe tasi lava le faauilavea toe o Papalii, le Minisita o Galuega tetele. Ua ou iloa e le lavea ai i le tulaga lea ua saunoa i ai Tuitama. Ae se i saunoa mai Papalii ona lafo loa lea i le saunoaga a le Sao Faapito.

**Susuga Hon Papaliitele Niko Lee Hang:** Ia faafetai i lau Afioga mo le avanoa. Sa tau tulai atu lava e lei saunoa le Afioga ia Loau, e lagolago foi i le mea sa selemole ai le ao o le Palemia. O le tulaga lea o le lagolago malosi lea o le Malo po o le Kapaneta, le Foundation lea mo la latou campain sa fai mo se fesoasoani. E tele lava se tupe sa aoina i le taimi lea a o selemole le ao o le Palemia se i tulou lava. O lea la ou te tulai atu, e tau atu ia Loau ma Afamasaga, ae o lea ua toe tulai lava ia e toe tau ia ia. Sa ou faapea se i faatali se i o matou talanoa atu i le laua foi fesoasoani foi i le Cancer Foundation, ma le Afioga ia Afamasaga. Ae sa ou faapea e tatau ona faatali se i matou viia atu ia. E pei o le tulaga lea, se faamolemole se i faauma atu.

**Afioga Hon Loau Solamalemalo Keneti Sio:** Lau Afioga i le Fofoga Fatalai, se ua leva na ou fia misa i se Minisita se. A o lea la ua tulai mai le Minisita lea ua manao ma te misa. Ia e leai o lou faaaloalo i ai.

**Susuga Hon Papaliitele Niko Lee Hang:** E leai e le o fia misa, o le mea lea o le tatou aganuu, o lou nofo lava ma toe vivii oe. O le mea lena e fai e le isi tagata mo oe ma Afamasaga. Aua e te fia faamisa...

**Afioga Hon Loau Solamalemalo Keneti Sio:** Lau Afioga i le Fofoga Fatalai, e le logo malie ia faaupuga ia i lau faalogo atu. O lea na ou taua, o lau saunoaga leaga na fesiliglia e lou itumalo aemaise si ou nuu. Po o le a le mea ua ou faavalevalea ai le selega o lou ulu. O le mea lea na ala ai ona ou fai atu, leaga o la e faafogfa mai, e pei e foliga mai na o le Afioga i le Palemia. A o lea la ua ou tulai atu, ae le o se fia vivii. Ma le agaga faaaloalo.

**Susuga Hon Papaliitele Niko Lee Hang:** Lau Afioga i le Fofoga Fatalai, se i faauma atu la ta...

**FOFOGA FETALAI:** Se i saunoa mai lau Afioga i le Minisita ona saunoa ai lea o.... faapuupuu mai Papalii.

**Susuga Hon Papaliitele Niko Lee Hang:** Ia faafetai i lau Afioga, o le tulaga la lea sa tapena ai Loau ma Afamasaga. Na matou fia o uma lava e otipoo o matou ulu, ae o le popolega la lea e saunoa ai Loau, faapea mai le mamalu o le atunu aemaise o matou itumalo, o matou ua valea. O lou popolega lena, ae leai ma sou ita i si ou uso o Loau, o lea e faamatala atu, le tulaga foi lea ia tatou. E le mafai ona tatou viia ni mea tatou te faia. Ave le viiga i le Atua, ae faatali se i avatu ni viiga a Minisita i lua galuega faalelei ia na fai mo le kanesa. O tulaga ia o lea e lagolago ai le Malo le foundation lea. Ma le faaaloalo lava.

**FOFOGA FETALAI:** E masalo, o le isi e ala ona le selea lona ao, tulaga o ia mea, e faasa e le toalua, ua tele le fia, ae faasa e le toalua, e selepoo loa lou ulu e sau ua i fafo lau atopau. E masalo ai o le mea lea na fefe ai Papalii. Ia taoto ia lea vaega, se i saunoa mai Leala.

**Tofa Lealailepule Rimoni Aiafi (Faleata Sisifo):** Ioe. Ou te nofo atu lava ae pei ta ita o Ae. I le talatalanoa i le seleina o ulu, se i vane le... A outou tagai mai, ona o lea e faapea a selepoo le ulu ona faapea lea e valea, e leai, o le style. A o le isi mea, o le vaega lea, e temporary le latou support i le cancer, a o au e for life lau support i le cancer. O taimi uma lava e vaai ai le tagata ia te au, o le fiafia ia o lona loto, toe tea ai le cancer. O lea la ma le faaaloalo lava, aua aua ne i tatou toe talanoa i le ao, leaga o le trademark a Lealailepule. Ma le faaaloalo.

**FOFOGA FETALAI:** Ua outou faafogfa la... se i tulai mai le Minisita o Fefaatauaiga....

**Afioga Hon Lautafi Fio Selafi Purcell (Minisita mo Pisinisi, Alamanuia ma Leipa):** Ia faafetai i lau Afioga. Ua ou tulai atu leaga o le mataupu lea

e talanoaina nei, e aafia tele ai lou nei tagata. O lea ou te malamalama tele i le taimi lea na selepoo ai ulu o le aualii ia. Sa to i ai lou pulou i le toa-lua lea faapea foi le Palemia, talu ai o le tele o le lagolago. E le soona faia ni faaiuga faapea ia te oe lava ae o lea na fai i Afioga i Minisita ma le Afioga i le Palemia. Sa ou faia foi le tulaga lea i le taimi i Niu Sila i le lagolago i le Cancer Society. Na ou sau la i inei, e i ai lava le taimi na ou fuafua e au ua tatau ona ou alu loa e lagolago le Cancer Society i Samoa, ina ua ou foi mai. O lea lava la sa ou auai i fonotaga, ma ou fia malamalama i le faafoeina o le Asosi lenei. Ma sa manaia lava, sa manaia lava i le taimi lena, ona ave loa lea i ai o lau lagolago, o le a ou alu atu matou te galulue faatasi, ona e i ai mafuaaga tatau ia te au lava ia. Na malosi, sa ma feiloai foi ma le Sao Faapito i se tasi foi o suegatupe, sa faaali foi, ma e silafia foi e le Sao Faapito lou lagolago i gaoioiga a le Cancer Society po o a lava ni mea. E pei o le taimi lena, sa lelei lava le momentum, ae po o le 2 tausaga ua tea nei, e pei ua fetoi foi lea le alu a le Asosi lenei. Ou te le malamalama po o le a le mafuaaga, ua le toe avatua foi ni pamphlet foi nei ia te au, ou te malamalama ai i gaoioiga la e fia fai, ni suegatupe, ma tulaga uma faapena. E oo mai lava la i le taimi lenei. O le tausaga le la talu ai, na tuu e oti ai foi lou ulu, i suegatupe nei, te i lava ua moloau faapea, e leai lava ma se tusi e faapea mai, o lea ua oo i le taimi o le a fai ai tatou suega tupe, ma sue ni sponsor e sue ai ni tupe, i le mea la lea o le oti o le ulu. E le i toe oo mai lava ina ne'i tuuaia faapea o le matou le o atu foi lea i sauniaga a le Faalapotopotoga lenei, a o le agaga lava ia e fia lagolago. Ia logo mai, ma tau mai ia mea, ona malamalama ai lea ma o atu ai lea e lagolago malosi, i le faamoemoe o le Asosi lenei. E tasi lava lenei Asosi e tatau lava ona faaauau ma ia malosi le tulai mai. Ia malamalama tagata Samoa, e le gata i le auga e maua ai tagata i le cancer, a o le lagolago mo e o lo o lo o maua i le cancer i le taimi lenei. Lau Afioga o le tulai atu lea, ne i faapea ai ua le... e lelei le logo mai, ona iloa ai lea o le mea la e fai ma o atu e lagolago. Ma le faaaloalo lava lau Afioga.

**FOFOGA FETALAI:** Ia faafetai. Se i... e te aafia foi i le fili lea.

**Afioga Hon Sili Epa Tuioti:** O se mea e fia faamalamalama atili lau Afioga i le Fofoga Fetalai. Ne i te i ua faapea le atunu e na o le Cancer Society lea e fai paaga ma le Malo. O le taimi lenei i tausaga uma lava, o lo o ave le fesoasoani tupe i totonu o le Tala o le Tupe mo le tatou Red Cross. E talu ai foi le tele o le aoga o le auauanaga a lenei Faalapotopotoga. O lo o i ai foi ma le tatou Vaega tupe lea e ave i le Meti. O si toeaina lea tou te silafia uma ia Walter Vemeullen, ona o le tulaga o lo o fesoasoani ia i latou o lo o momoe taagugulu. Ma le faaitiitia o le tulaga o le suka. O lea e \$200,000 lea e ave i ai i tausaga uma, o le faigapaaga lena, aua e le maua uma tomai i totonu o le Falemai. A o lo o fesoasoani mai ia lenei vaega agalelei, o mea lava ia e tatau ona fai e le Malo. A faapea e le o maua e tatou ia auauanaga i

totonu o le falemai, a o la e maua ia tomai i nisi o le atunuu, e tatau ona ave i ai le fesoasoani ina ia tatau ona tatou galulue faatasi. Ma le faaaloalo lava.

**FOFOGA FETALAI:** O lea la ua manino le tulaga o mea uma e pei ona saunoa i ai le Minisita. Ia malo faafetai, o i latou foi na ofoina atu le lagolago, e faapena le fesoasoani tatou te galulue tatou te fesoasoani. E masalo ua malamalama le tulaga lea. O lena foi e i ai seleni e ave i nisi o Faalapotopotoga, ia faasoa lava pe a lava seleni e tofutofusia, e foia ai nisi o mea e manaomia aemaise o le Soifua Maloloina.

Ou te tapa le Afioga i le Sao Faapito, malie foi lou finagalo ua tuu atu lava ina ia faamanino le tulaga o lo oulua finagalo e pei ona taua. Ae tulai maia e faaaauau le saunoaga.

**Afioga Hon FIAME NAOMI MATAAFA:** Ia faafetai. Ia ua aoga le lauga a lenei usuga fono e faaali ai foi le silafia e le gata i le Kabeneta a o le tatou Maota. E manaia lea, o le uiga lea o le tatou fetufatufaai, i lenei mataupu taua. E pei ona amata atu i le saunoaga a le Minisita, e pei o lea ua agai mai ai ia le mea lea na aliai mai ai o le avatu o le lagolago. Aemaise e amata mai lava i le Taitai, Afioga i Minista ma Alii Faipule, mo lenei lava faamoemoe. Ma o le upu foi lea i lau Afioga i le Fofoga Fetalai, e pei o lea e tau maua mai i le Minisita o Galuega Tetele, le mea foi lea. A ua tatou faia se galuega ua lelei, e le o ia i tatou la a o le viiga o le Alii. Ae pei o le mea lea e maua atu, ua mau avanoa e faaali ai galuega tetele ma galuega matautia ua faatino e sui o le Maota lenei. A e le o le agaga lena o le mataupu sa tau momoli atu, pe o le faaletonu foi o le avatu o le mataupu. Lau Afioga i le Minisita o le Soifua Maloloina, o Faalapotopotoga ia tatou te fai paaaga, e i ai i totonu i latou e i ai tomai faapitoa faafomai, faatausi soifua. E pei o le uiga o le faamatalaga o le tatala atu i tua o le auauanga po o lava tapena ia Faiga Faavae ia i latou nei, e mafai ai ona latou faatinoina togafitiga, po o nisi fesoasoani mo sui o le atunuu, o lo o lavevea i le faamai o le kanesa. E na ona pau lava lea. Aua a faapea tatou te faamoemoe tasi i le aufaigaluega a le Falemai, e gata ai lava i i, ae a faapea o i ai nisi o le aufaigaluega o Faalapotopotoga faale-Soifua Maloloina. O ia i latou le tomai faafomai faatausi soifua, pe i ai se faiga e mafai ona faatino ai e i latou ia togafitiga ma le galuega. E pei o le uiga lena o le faamatalaga.

Ona ou see mai ai lea lau Afioga i le Fofoga Fetalai i le Koviti-19, ma ou te iloa ua tatou maua uma le lagona o le faafetai, ona o lo o malu puipuia pea lo tatou atunuu mai le faamai lea. Ma ou te lagona e tele le galuega a le Malo, ma o le faamuamua e ave i o tatou tuaoi po o tatou borders. Ina ia amata mai ai i ina le taofia o le oo mai o le faamai. O lo o feagai foi lo tatou Malo ma le mamalu o le atunuu ua toe fia foi mai, ma e le o se galuega faatauvaa foi lena galuega. E fai o le taumafaiga e faamaopoopo i latou uma o lo o fia foi mai i le atunuu, ae tele foi le tamaoaiga e manaomia, e faatino ai lena

faamoemoe. Ae e le mafai lava ona avea le faafesili i le mafaufau. Aua e pei o le border protection le aua ave i ai le tatou faamuamua. A o le mea lea e le o manino lelei mai, po o le a tonu ia tatou fuafuaga faataatitia ma tatou tapena i ai i se taimi e oo mai ai ia le faamai ia i tatou. Ia o lea foi ua aumai ia le faamatalaga ua tau lalata mai ia le taimi e oo mai ai ia tatou tui puipui, ia talosia ia. Tatou talosia ia ia mafai ona maua mai ia lena fesoasoani.

Ae o le mau lava lea o lea e tatou te talanoa ai i le Tala o le Tupe, ua tele foi ia fesoasoani ua aumai, ae po o fea o taatia ai le tatou tapenaga, pe a faapea ua tupu se mea ua oo mai ia le faamai i totonu o le tatou atunuu, aemaise lau Afioga i le Fofoga Fetalai, ou te iloa e ese le tele o le aoaoga ua o tatou maua i le faafeagai ai ma le Koviti i le mea na tupu i le misela.

O lea foi ua ou vaai atu ua taatia ia le galuega a le Komiti sa nafa ma le iloiloina o lipoti o le misela lea sa faataatia i totonu o le tatou Palemene. Ia ou te le ma iloa lau Afioga i le Fofoga Fetalai po o le a se taimi e talanoaina ai lena lipoti.? Aua o lea lava e pei ua faagasolo lava ia galuega a le Palemene ua matauina aemaise lava ia le Nofoaiga lenei, ua sea sea lava ona maua ni avanoa e talanoaina ai ni lipoti aemaise o ni lipoti i ni mataupu ogaoga i mea ua tutupu i totonu o le atunuu.

Lau Afioga i le Fofoga Fetalai, o le mea na tupu i le misela, ia faafetai i le tali mai o Malo eseese ma Faalapotopotoga i le foia o le faafitauli i le pepesi o le faamai i totonu o le tatou atunuu. O lea na maliliu ai ni tagata e 83, o nai tagata matutua ia ae toatele lava ni a tatou fanau laiti.

Lau Afioga i le Fofoga Fetalai, a faapea na i ai se aoaoga mo tatou i le mea na tupu i le misela, ma le mea ua tupu i le Koviti, o le tatou iloa lea faitau mea e ono tutupu. Ua leva ona talanoa le itulagi i le misela ua toe pepesi i le lalolagi...

**Tofa Hon Faimalotoa Kika Iemaima Stowers:** Lau Afioga i le Fofoga Fetalai...

**FOFOGA FETALAI:** Malie lau Afioga....

**Afioga Hon FIAME NAOMI MATAAFA:** Tulai mai o le misela i totonu o Niu Sila, o faailoilo na lau Afioga i le Fofoga Fetalai, e i ai le mea lea ua tupu...

**FOFOGA FETALAI:** Malie lau Afioga o tulai mai ia le faauilavaea....

**Afioga Hon FIAME NAOMI MATAAFA:** O le fesili la lau Afioga, pe sa o tatou faitauina na mea? Ia saunoa maia lau Afioga...

**FOFOGA FETALAI:** O lo o tulai mai le faauilavea i le Minisita lau Afioga...

**Tofa Hon Faimalotoa Kika Iemaima Stowers:** Faafetai i lau Afioga i le Fofoga Fatalai, o le saunoaga foi a le Afioga i le sui usufono mamalu e le o fia faalavelaveina. Ae ou te talitonu e le o mapu le taulogologo mai o mea ia sa faafesili e ala i a tatou border protection, o faiga faavae, Plan of Actions pe a tupu mai se mea o lo o taulogologo mai pea i lea taimi ma lea taimi, ia aemaise foi e ala i faatalanoaga a le Taitai o le atunu ae le gata i lea o le tatou Komiti o Faalavelave Faafuasei, e le o mapu le taulogologo o mea uma o tutupu, e pei ona faafesiligia.

I le saunoaga foi e tusa ai foi pe faapea mai ua tele le aoaoga i le taimi o le misela, ou te faamonia lea saunoaga. A le aoaoga lena o lea ua savali ai ma e o lea foi na faataatia mai le lipoti, ma e na matua talanoa toeitiiti fia aso o talanoa lava le mea lea o le misela i le taimi na faatalanoaina ai.

O lea ua silafia uma ia mafuaaga na mafua ai le tulai mai. E laitiiti le pasene o fanau na tuiina i le tui puipui o le misela. Ma e tele foi mafuaaga na mafua ai. E fai o le lē faataua e matua o le ave o tamaiti e tui, afai e moni le mea lea o le au o matua fanau, e tatau ona faataua i matua o nisi o talitonuga faa-Eklesia. Sa i ai foi le faalavelave sa tupu mai i si o matou falemai i Safotu, na toe taofia ma toe telegese ai le tuiina.

O leaoaoaoga taua na o tatou maua mai i mea uma nei, a lea ua tulai atu le Malo, ina ua uma ona... faafetai i le taupati mai o a tatou paaga mai i fafo tuu mai le tauau ma fesoasoani mai. Ae i le tilotilo faale-mafaufau i ai, ua maea ona tatou fai i totonu i i le fofo, ua tulai atu le Malo ua faatulai le Tulafono ua o tatou faaigoaina o le Tulafono o le Alofa, ina ia aua, aua, aua ne i toe aliae mai lea faafitauli i se taimi o lumanai.

O lea foi na ou taumafai i le Fono talu ai i le Tala o le Tupe e toe tatai mai ia le misela se i avatu mafuaaga faa-Soifua Maloloina ina ia saga faataua, ne i toe... ae sa faatulai mai foi se tasi o sui usufono ma faapea mai, o le a toe talanoaina foi ua lauvivilu le talanoaina o le lipoti i i. Ae na ala ona ou taumafai e toe tatai mai le misela i totonu, ina ia fagufagu pea o lo o ua alu soloatoa le galuega o lo o fai e le Soifua Maloloina. E le gata i le falemai tele i Apia nei, falemai i Tuasivi, o falemai uma i nuu i tua i Upolu nei faapea Savaii. E faapena ona o atu foi taavale, e o atu ai le aufaigaluega i nuu ma afioaga, ina ia faataunuu uma ia tui puipui e le i faia. Pe toe maua ai foi ma se misela, o le tulaga lena o lo o taumafai ai le Matagaluega.

O lo o alu galuega ma faasalalauga mo le silafia ou te le iloa po o le a le isi mea. E tuualalo i le ao, le po, o leitio, TV o mea uma lava, ia ou te talitonu o faapena ona valaau mai le atunu ma faafetai mai. Ia o se faamatalaga lena e tusa ai foi o saunoaga ua opea i le Maota ma le agaga faaaloalo.

**FOFOGA FETALAI:** Ia malo, masalo ua faamalieina le finagalo o le sui usufono le Afioga i le Sao Faapito.

**Afioga Hon FIAME NAOMI MATAAFA:** Faafetai tele i le saunoaga malamalama a le Afioga i le Minisita. Ma e le masalosalo i le Afioga i le Minisita ma lana galuega o lo o faatino i le taimi lenei, manatua e tupu le mea i le misela sa le i i ai le Minisita i totonu o le Matagaluega. Ae matauina, e talu ona pale atu, e matagofie le tulai mai...

**Tofa Hon Faimalotoa Kika Iemaima Stowers:** Lau Afioga i le Fofoga Fetalai...

**FOFOGA FETALAI:** Ia, se i...

**Afioga Hon FIAME NAOMI MATAAFA:** I le faatinoina o ona tiute...

**FOFOGA FETALAI:** Se i malie lau Afioga, leaga o lea ua e toe... e malu a apefroe le saunoaga, ia ae pei ona faapena ona afaina ai le sui usufono mamalu. Ia ae o lau Afioga foi i le Sao Faapito, ia e tupu mea ia o tatou faatasi i i avea oe ma aao taumatau o le Palemia ma le Kapaneta. E ui i lea o le a le toe oo tele i ai se lagona. Ia ae alofa ia e faamama le sausau, ia e le faigofie foi le tali atu o le Minisita. Ae ui i lea, lau Afioga i le Minisita o lea ua ou faaooina lou finagalo.

**Tofa Hon Faimalotoa Kika Iemaima Stowers:** Ia o se mea lena na fia faamalamalama, faamolemole na tofi ita, 4, 5 masina ae oso le misela. Ua leva ona ta i ai i le Matagaluega ma lo ta agaga faaaloalo.

**FOFOGA FETALAI:** Faafetai, ia e faapena lau Afioga e ioe, mama ia le sausau i lea vaega ae see atu i se isi itu leaga sa... na ona faamanatu atu o oe foi sa e foemua i i, i le tulaga o ia mea ae tuu se isi mea.

**Afioga Hon FIAME NAOMI MATAAFA:** E sao lelei lau Afioga ae e pei e malie i le saunoaga a le Taitai i le taeao nei i le tulaga foi lea o le faafesili a le Minisita i ana Ofisa po o le aufaigaluega a le Malo ia i latou o lo o i ai tomai faapitoa. A faapea e i ai se feau mulimuli i lenei mataupu, ou te faaupuina faapea oi i se mea e ono tulai mai i le tatou faitauina o mea ua aliali mai, o mea foi ia e tau o fua momu.

A aliae loa fua momu, aemaise mo i latou e i ai le tomai faapitoa, o i ina, e amata ai loa le tauologologo. O lau lava vaai, o le mea lea e pau i lipoti nei, e le i iloa e tatou faitau fua momu. E le i iloa e le tatou Matagaluega, ae o lea ou te iloa, 2 lelei fono tetele faale-soifua maloloina 2019, aumai ai lava le feau lea, ua toe pepesi le misela. O fua momu na, ae a? Alu ai lava tatou, tupu i Niu Sila, o le isi fua momu lena, alu ai lava tatou.

E pei o le uiga lena o le tautalaga i lau Afioga i le Fofoga Fetalai, i e o lo o i ai le tomai ma le tiute e feagai ma mea nei...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai...

**Afioga Hon FIAME NAOMI MATAAFAA:** Faitau ia faailo, fua momu ua aliali mai..

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O se mea e fia faasao....

**FOFOGA FETALAI:** Malie lau Afioga o lea ua tulai mai le Afioga i le Palemia...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O au e matua ofo ee i le aumai soo e le sa Sui Palemia sa nofo i lou itu taumatau o lenei mataupu. O le tele o matou talanoaga, e le mafai ona malamalama i ai, aua e fai lava talanoaga ae o la e taaloalo i lana telefoni. E uma atu se mataupu ae toe fesili. E le mafai ona malamalama ia o lea foi lava e toe fai i i. Ae o mea ia, ua uma ona matou talanoa ai.

Ou te le iloa po o le a le ituaiga fua momu, ou te matua ou leiloa ituaiga fua momu. Ae ina ua uma ona faasalalau ma tatui tagata, o le auala lea e i talaane o le falemai, o lea e oso mai i luma o le faleoloa lea o Netzler, o le tumu o fua momu i le taeao, ae ua leva ona tatui tagata. Ae o lea lava e tau mai e le i o lava e tui.

O le faalavelave lau Afioga i le Fofoga Fetalai, ua leva ona faalele fua momu, ae a oo mai lava i le faaiuga, e le mafai ona e faamalosia tagata. O le saoga o le mea lea, ua uma nei ua uma ona fai le tuiga ua tui uma tagata, ae ova i le 2,500 tagata na toe tui mulimuli e le Matagaluega o lea na o le Matagaluega o Tina toe sue mai, o la e mumusu tagata e tui aisea? Leaga o lea lava e gaoioi o latou manatu, o lea sa togafiti latou a o laiti i fofo Samoa.

O le eseesege lena o Samoa ma atunu i fafo, e tele o atunu e leai ni a latou fofo, mo mea e faaaoga i ai laulaau, faatoa sau le tui lenei e leiloa po o le tausaga ea e 1963, ae na togafiti au i mea faapea. Mo mea o fuefuesina ma mea faapena, na uma ai ma lou mai. E malamalama i ai le tele o tina e fai i a latou fanau, i faasalalauga sa avatu ma nonofo i luma o TV ma matamata ai i faasalalauga ia na avatu. Ae le mafai ona malamalama i ai se tagata, e le faataua e ia, aua e leai se fanau, toe le nofonofo i le TV i po uma, e alu e tafao.

Lau Afioga a o faasalalauga ia na fai, sa ou matamata lelei i ai, ma ua leva foi ona faataatia le lipoti lea o le misela 2019 i totonu o le Palestine o le

tatou Maota nei, o lo o faamatala uma mai ai lava gaioiga sa fai, atoa ai ma le anoano o mau fua momu ia e talanoa i ai le sui usufono.

Lau Afioga i le Fofoga Fetalai, ua ou leiloa po o le a le ituaiga faamalamalama i se sui usufono, ua matua tumau i lona mafaufau se mea e faitioina ai le Matagaluega o le Soifua Maloloina, ma vaai maualalo ai i le galuega sa fai e le toatele o fomai ma le tele o tausi mai sa feoai i tua.

Lau Afioga i le Fofoga Fetalai, ia o le tulaga lena. O au foi sa fealuai ma ou fealuai i tua ma matamata ai i mea ia e fai ma galuega ia sa fai. Na matou o i Savaii, na matou o i Savaii ma matamata ai i mea sa fai. Ma e ou te faafetaia, faamalulu foi ia i latou o fomai ma teine tausimai ma le aufaigaluega atoa a le Malo sa o i tua i le galuega sa latou taumafai e fai, ae o lenei e oo mai o lo o faitioina, faitioina, faitioina pea e latou e le i ola mai i le tulaga lea o le galue.

O le galue e le faigofie le usu mai i le taeao ua ta le 5:00 e le i ao, fai faigalotu ona o ai lea i tua, ma faatoa omai, o isi e omai ua leva le po ona o le galuega tele sa o latou fai. E faigofie lava ona faitio e latou e le i galulue ma o i tua e vaa i mea ia.

Lau Afioga i le Fofoga Fetalai, o le toe faaopoopo atu lena, o le toe sasa o le mea o le solofanua se i tulou lava, ua leva ona mate, ae o lenei lava e sasa.

Ia lau Afioga i le Fofoga Fetalai, o le fesoasoani atu lena i le tatou mataupu.

**FOFOGA FETALAI:** Malo, ia...

**Susuga Hon Laauli Polataivao Leuatea (Gagaifomauga Nu.3):** Lau Afioga i le Fofoga Fetalai e fia maua se avanoa faamolemole lava...

**FOFOGA FETALAI:** Ia se i onosai mai lava se i fai atu si upu laitiiti lea a le Fofoga Fetalai. O lea ua i le faasologa o Pepa o Galuega le talanoaina o le Lipoti lea. Ua uma na o le Lipoti o lea na tuuina atu i le Komiti e latou te toe iloilo ia ma lipoti mai le latou lipoti i le Palemene. Ia lea, Pepa a le Palemene 2020/2021 Nu.116, Lipoti a le Komiti Tau i le Vafealoaloai, i le Pepa a le Palemene 2019/2020 Nu.199 Lipoti i le Faamai Pipisi o le Misela 2019.

Ia e pei o le tulaga lena e faamanino atu lea itu. Ia afai o le itu lea o lea e te fia saunoa i ai Laauli, pe ese le...

**Susuga Hon Laauli Polataivao Leuatea:** Lau Afioga e tautala lava ma le faaaloalo o le tausisia pea o le mamalu o tatou felafolafoaiga aemaise o tatou Tulafono Tumau. Ioe lau Afioga, o lea lava ua agai tuleiga ma saunoaga e taua ai le natura o le tatou soifuaga o lo o i ai nei i totonu o le Maota. Na saunoa ai le Taitai o le Malo, e le malamalama se tagata e leai sana fanau...

**FOFOGA FETALAI:** E leai la, se malie lau Afioga, o a tatou Tulafono...

**Susuga Hon Laauli Polataivao Leuatea:** Malie lau Afioga Toleafoa, e tausisi le mamalu o upu faifai upu ia, o upu faalumaluma upu ia...

**FOFOGA FETALAI:** E te le fesiligia ia le...

**Susuga Hon Laauli Polataivao Leuatea:** Faamolemole, malie lou finagalo, aveese ma a tatou faamaumauga. O lea e taoto i lagatonu le soifuaga o le Sao Faapito. Malie Toleafoa...

**FOFOGA FETALAI:** Malie le sui usufono...

**Susuga Hon Laauli Polataivao Leuatea:** Malie lau Afioga, e fai foi o lou finagalo, ae o le matou foi taumafai atu. E le mafaufau upu ia, e faalumaluma upu ia, faamolemole.

**FOFOGA FETALAI:** Onosai mai la i lalo, aua leaga o lea e taumafai atu le Nofoa, ia ae o lea lava e te tulai mai. Ia ae o lea sa ou avatua le faamaninoga i le isi itu lea sa laga e le Afioga i le Sao Faapito i lana saunoaga, lea na mafua ai ona tulai atu le Malo, le Taitai o le Malo, e fai lana faamalamalamaga e tusa ai o le mataupu lea.

Ia o lea ua e tulai mai, ia e le o faapitoa le saunoaga a le Palemia i le tulaga o le Afioga i le Sao Faapito, tulou, o lea e faalauaitele i le mea o le silafia faa-tina. O le silafia faa-tina ina ia faapena ona e fua le faasologa e soifua mai le oloa taua a le Atua i le ulugalii, ae faapena ona fai le tui puipua, 6 masina faapena. E oo lava i le... e pei lava e oo lava i le 15 tausaga ea e pei e faapena le faasologa.

E na o le itupa o tina latou te masani i le tulaga lea. Ia ae o le itu lea na taua e le Afioga i le Palemia, e le o taua le Suafa Paia o le Afioga i le Sao Faapito i le tulaga o lo o i ai. Ia ae a na e le saunoa lava Laauli e le faafofoga mai le atunuu e pei o lea ua faapitoa le saunoaga a le Palemia i le Afioga i le Sao Faapito. Leai o lea tou te silafia e tatou te iloa, o le Sao Faapito o se tasi o aunafaapae se i tulou, e puipui foi i ai se lagona o le Fofoga Fetalai.

A o upu faa-fono lava latou, ia e faapena ona faamanino i le tulaga o i ai mo le silafia e tina aua e le faia e tama le tulaga lea. Ioe lea a na le fai nei le taofi le shut down a le Malo, ia ae o atu, ia e oo lava i isi tagata matutua ua feoti fai mai e le fia faia ni a latou tui puipui. Ia a na le feoti lava le isi aiga e le... e faapena.

O tatou e le tutusa lagona, e tasi lava le mea e eseese ai tagata na faia e le Alii, o le mafaufau. E tutusa uma mea uma, ae na o le mafaufau lava e eseese ai. O le mea la lea, afai o faamanuaina ai le tofa maualuga i lau Afioga Fiame, ia ou te faamalulu atu ae ese foi le faitauga a le Nofoa. Laauli, ou te faamalulu atu foi i le saunoaga lau Afioga.

**Afioga Hon FIAME NAOMI MATAAFAA:** Faafetai lava i lau Afioga i le Fofoga Fatalai, e ese le tele o mea e tutupu mai i lau lauga, ia ua oo i lou tulaga taupou ua oo foi i ai saunoaga a sui usufono.

Ou te manatua ai, ia le matou asiasiga...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fatalai, se faamolemole lava...

**FOFOGA FETALAI:** Ia, se i toe tulai mai le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O au lea sa tautala i le nauna lautele, nauna lautele o tina tonu ia na maliliu fanau ua i ai le latou silafia. Ua i ai le latou silafia leaga o mea lava ia e tutupu e o e ave a latou fanau e togafiti.

E oo foi la i le eseese mo mea o tina matutua, ma latou e leai ni taitoalua, e seasea maua i le fale. E matamata la i polokalame ia e laulau atu e le Minisita. O au ia e matua ou tilotilo lelei pe a alu atu polokalame ia, e faasilasila atu ai, e matua le misi, fai lava sau, sau, sau i taimi uma le tulaga o le lapatai mai i le misela.

Lau Afioga i le Fofoga Fatalai, o le mea lena e agai i ai le Minisita e tau faamalamalama. Ae leaga ua fai si leva atu, ae o lea e i ai le tatou Lipoti, o le Lipoti na faataoto i totonu o le Maota lenei. O le upu foi faapea e le talanoa, o lea sa faataatia le Lipoti lenei i totonu o le Maota, a alu foi i o, toe foi mai i i, a alu atu foi i le Komiti e latou te vailiiliina le Lipoti, e toe foi mai lava i inei, ma tatou talanoa ai. E le faapea la o le a saunoa le sui usufono, le saunoa le sui usufono i le Lipoti faapea lea e le i lava le talanoa. Ae o ai na fai atu e aua e te saunoa ai?

Lau Afioga i le Fofoga Fatalai, o lea e manino lava faamatalaga o lea e taumafai e avatu, ina ia fofo ai le mataupu lea. Ua leva, sau i o, ua sau faafia i le Observer le mea lea? Ua sau faafia? Ua sau faafia ma ou tali lava i ai. Tali lava i le tulaga, a tuu i le tulaga i le mafuaaga, ia o lea e tatou te iloa lelei lava le mafuaaga. Sau mai Niu Sila, a tatou tali i le tulaga o le taumafaiga o le Malo e tui, o lea na oo i tua. Ae uma ane, e toatele lava tagata e le i tuia ma tagata o lea e lalata atu i o i le falemai e na ona tu atu lava i luga savali atu i o tui loa, o le a faapefea ona fai pe afai e musu lava le tagata ia? ona tuuai fua lea o le Malo.

Lau Afioga i le Fofoga Fatalai, se e tatou te le o i se isi paneta, o lea e tatou te i inei i Samoa. Ae o le mea sili ona ou faanoanoa ai, sa saofai i totonu o le Kapaneta. Ae e leai se taimi ua talanoa mai ai i le Kapaneta i mataupu ia.

**FOFOGA FETALAI:** Ia e i ai le manatu, faatea ia lea mo... ia malie ia lau Afioga i le Sao Faapito ia tatou see atu i se isi mea.

**Afioga Hon FIAME NAOMI MATAAFA:** Ia faafetai tele i lau Afioga, se i fai atu la lau tala lea sa tau fai atu, ua ou manatua ai le asiasiga a le Malo ina ua mavae le tsunami, ona alu loa lea o le asiasiga a le matou Kapaneta, matou taamilo atu i le itu lea tau i Aleipata lea sa tele le lavea. Ia ona afea ai lea o si o matou foi itumalo matou o i lalo i le mea e i ai lou fale. Ia matou o atu loa, la e tu mai lou fale e le i afaina tele, matou taamilo mai loa faaaauau le matou malaga i Lepa ma Aleipata.

Ua o matou tutu la i Lepa ia ma o matou matamata foi, ae o lea ou te vaai atu, ae e pei e talie isi alii o le Kapaneta ma tilotilo mai ia au. Ia ina ua toe faaaauau le matou malaga, ou fai atu i isi ou uso a Minisita lea i totonu o le taavale sa i ai, o le a ea le mea lea sa outou talie mai ai ma le aualii le la? Ae fai mai, e le iloa ea pe fai atu le tala pe leai, ou fai atu, ia fai mai pea. Ae fai mai, ina ua o matou o i lalo, i le mea lea sa i ai lou fale, e matou te o tau la e tu matila mai le fale i le matafaga e le i afaina i le tsunami. Fai ai loa a latou talaula, o i, ua faamaonia ai lou tulaga taupou, tai pei o le mea foi lea o le maamu i Savaii, lea na alu atu taamilo i le tuugamau o le taupou. Ia faafetai tele e eseese lava auala e iloa ai na tulaga. Ne i te i foi ua faamaite, ia lea ua ou taofi i le finagalo o le Palemia o lana saunoaga faalauaitele.

**FOFOGA FETALAI:** O lou tulaga mamalu na o lea e i ai Fiame.

**Afioga Hon FIAME NAOMI MATAAFA:** Ou te manatu ua faaiuiu foi se matou talanoaga. Ae e na o le pau lava lea lau Afioga, o le mea e tau o le fua momu. O le fua momu, o se logo lea e aumai. Ae na o le pau lava lena o le fesili. A na tatou vave faitau pe tatou te iloa le fua momu, pe i ai se suiga o le taunuuga lea na oo i ai tatou ma le maliliu o tatou fanau. E na o le pau lava lea, o le tatou iloa faitau, ma e i ai le faamoemoe, e pei foi o tagata e vaai tau, lea e aumai ai le lipoti ia tatou i le louloua o le tau lea e i ai nei, e faapena foi isi vaega o le soifuaga. E i ai lava fua momu ma faailo ae pe tatou te iloa faitau.

Ia faaiu atu ai se matou faamatalaga lau Afioga i le Fofoga Fetalai, ia ua matau ua saunoa foi nisi o le Maota i le tulaga e masani ai, faaiuga o Nofoaiga ia ma e le salaese ai foi so matou taofi. Ae tau o le agaga e molimoli atu ai faamanuia i lenei Nofoaiga ma le Paeaiga, ia amata mai lava i lau Afioga i le Fofoga Fetalai, le Afioga i le Palemia ma le Kapaneta ma Minisita Lagolago, faapea foi lea Itu o le Malo i Afioga i sui usufono. Ia momoli atu le tatou faamoemoe pe a mavae lenei Nofoaiga, tatou tapena mo a tatou faiga palota, ia o le agaga lava ma le faamoemoe o Samoa ua faatalaleleiina. Ua i ai le malamalam, 60 tausaga toeitiiti 60 tausaga o lo tatou Malo, ia e leai se mea e tupu, tatou tapena ma le fiafia, o le a le faaiuga a lo tatou atunuu e

aumai, ia o e faaaauau le tautua, faafetai. O e o le a malolo e pei o lau Afioga po o nisi foi o le a le toe taliu mai, ia tatou tofu lagona i le agaga o le faafetai i le maua pea o tatou avanoa e lafo ai le tatou maa, ia ma fai se tatou tautua mo Samoa. Ia manuia tele le Fono lau Afioga.

*Na faaalia le agaga fiafia o le Palemene i le patipati o latou aao i le maea ai o le saunoaga a le sui usufono mo Lotofaga.*

**FOFOGA FETALAI:** Ia faafetai. Ia se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai ou te tulai atu e momoli le faamalo i le Sao Faapito e tusa o le saunoaga o lea ua opea i le tatou Maota nei. Ae sa ou le fia faalavelave i mataupu ogaoga e 2 sa ia taua, o le a ou... ou te manatu e le tatau ona tuua se manatu i tua. E 2 mataupu ogaoga ia, e tatau ona fai i ai se faamatalaga. O le mataupu e tau o Upufai o Malo, o le a taoto atu ou te tali maeaea atu i ai, i le taimi e oo mai ai le faasologa ia te au ma le Kapaneta.

Ae pau lava le vaega lea sa ou manatu e fia oo atu pea i ai sina taofi, o le tulaga lea na taua e le sui usufono i le Faalapotopotoga a le Kanesa. O le a ou le toe oo foi i saunoaga a le Minisita i le auai i taumafaiga a lenei foi Faalapotopotoga taua i latou sailiga seleni. O lea ou te manatua o le aga lava lea a le Faalapotopotoga ina ua faatoa faatu, e fai nai a latou feiloaiga faapea ona valaau mai loa lea o au ou te alu atu ou te faia sina au tautalaga. O lau aluga la lea e fai lau tautalaga faamalosiau ia i latou o lo o taulamua, lea la faatoa amata ai le latou auala lea o le taoti o ao foi o latou e maua mai ai sina seleni. O lea ou te manatua e toa-fa latou na faatino ai le fuafuaga i le aso lea. O au la, ua mananao nei latou e faatino le faamoemoe lea, ona ou fai loa lea i ai, e 3 masina lea o le a tuu mai, ona e i ai le mataupu o le valaauna o au i fafo, ou te alu muamua i fafo ona ou foi mai ai loa lea faatino loa le latou faamoemoe. Ia, o le avanoa la lea ua maua e latou e mafai ona o e faaaoga loa lau folafolaga lea e o e sue ai ni a latou sponsor ina ia tele se latou seleni e maua ai. Ua mafua ona ou taua le mea lea, ona o le amataga lea, o isi la ia sa latou tapa e mulimuli atu, e aofia ai foi ma le Sao Faapito. E pei lava ou te tau manatua na vali ai ea lona ao, o au la a, na matua oti poo lava le ulu. O se foliga mataga e oo i se tagata e tupu ai se mea faapea, ae le i faatauaina lena, ona e taua ia te au le agaga. E le gata ai la i i, e tele isi a latou... e i ai foi nai isi fonotaga sa fai mulimuli. Ona ou alu lea, ou te matau la o i latou ia e aafia ai, o latou o lo o i ai aiga o lo o gasegase i le kanesa, ma o se itu taua tele lea o le i ai o se Faalapotopotoga faapea e lagolago i le galuega o lo o faatino e le Soifua Maloloina.

O le latou feiloaiga lona 2 lea sa fai i totonu o le falemai, eleele o le falemai, na ou alu foi fai i ai lau tautalaga faamalosiau, lea na agai ai lau tautalaga, o

le taimi muamua lena na ou taua ai loa le kanesa lea o le prostate, sa fai foi ma ulaga a isi ia te au, ae o le gasegase ua leva ona ou faitau ai, pe 3 ea tusi o le prostate cancer na ou faitau ai ma ou iloa ai, o le faamai e aafia uma ai lava tama tane, aafia uma ai lava pe a umi lou soifua. A e sao mai isi mea, o le prostate cancer e muamua lava faai ai lou soifua. E i ai foi la auala e taofiofi ai. O i la i le fono lea sa ou talanoa ai, e base i luga o tusi nei e 3 na ou faitau ai. Ou te manatua le isi tagata foi o le Malo, na uma loa sau loa alu fai lana suesuega, o lea faatoa malamalama. Ia ua malamalama ai foi la ma le tatou Maota, o outou uma lava ia pei o isi e amata atu lava ona maua i le 50. Na maua ai lau Minisita aupito talavou o lau Kapaneta ma maliu ai.

Lau Afioga i le Fofoga Fatalai, ua ala ona ou taua le itu lea, ona e tele lava mau faalapotopotoga, e aofia ai ma civil societies e faatu, e lelei foi le faamoemoe ma valaaau mai foi ia te au ou te alu atu e fai sau tautalaga, ia lea foi la e i ai le fesoasoani a le Malo lea e ave i ai. O lona uiga, e le o se faalapotopotoga o lo o fulitua i ai le Malo. E leai se mea e tua i ai, e tatau ona tua i le falemai, tua i fomai, tua i Minisita. Ae taua le aumai i lumamea. Sa ou le manatu o se mataupu e tatau ona aumai i luma i le tofamamao i se le auai o ni fomai i se sauniga e tasi, sauniga lotu. Na valaaau ai ma au, ona ou valaaau lea i le Minisita, "E i ai le tuatuagia o au, e le mafai ona ou oo atu ai, ae faanoi ane, o oe lava o le Minisita, o oe foi o au lava lea, ou te le tau auai foi, o lena e te i ai." A o le agaga lea i faalapotopotoga nei, e fiafia e vaai mai ua auai uma ona o le itu taua e avatu le teutusi o le fesoasoani. O se itu lelei.

Lau Afioga i le Fofoga Fatalai, e i ai le faigalotu a le isi foi Matagaluega, lata mai nei lava, ma o lau matau, ou te fautuaina Faalapotopotoga nei, a oo ina i ai se tou faamoemoe mo se sauniga lotu e fai i le Aso Sa, talanoa muamua i le Minisita pe talanoa mai foi ia te au, ona ou tuualalo atu lea, aua le faia i le Aso Sa, fai i le Aso Toonai. Leaga o le Aso Sa, o tatou uma lava nei masalo o le tele o tatou nei o lo o i totonu o le Palemene, e i ai tiute, e i ai tofiga i latou foi Ekalesia. O au nei, e 2 fono tetele lava o lea ou te taitaia, o le Aso Sa e fai ai fono, le taimi tonu lava lea o lea e fai ai le faigalotu lea. E i ai la le tulaga taua, aua masalo o le toatele o i latou nei e i ai i totonu i i i Faalapotopotoga ia, e le o manatunatu i le tulaga lea, o lea e aafia le Minisita i a latou Ekalesia ma lotu e fai tonu i le taimi tonu lea ma fonotaga faale-Ekalesia. O le tulaga la lena o lea foi e faafogafoga mai foi Ofisa Sili o Pulega o Matagaluega, a fai ni a outou faigalotu o ni sauniga tetele, tuu i aso aunoa i le Aso Toonai, le afiafi o le Aso Toonai, ae faasaosao le Aso Sa, leaga o le tatou atunu o le atunu kerisiano. O le toatele o tatou nei e fai o latou tofiga, ma e tatau ona auai i le faamaopopoga o latou foi Ekalesia. E faigofie la ona le auai i i ona tuuaia lea, a o le faaletonu lea e i ai, o le faatulagaga o le polokalame. E faigofie lau Afioga le mataupu.

O le itu la e faataua, o lea sa auai le Minisita, auai le Ofisa Sili o Pulega o le Matagaluega, o ai nisi o toe aisili? O ai nisi o toe aisili, o lea ua auai le

faatumutumuga o le Matagaluega? Ae taua le itu lea, ona o i latou nei e faia tonu nei, e le o malamalama i mea ia, e le faapea la ua le auai, e faaalia ai i i le le lagolago. Oi a le lagolago a o a nei mea e fai? O lea foi ua saunoa le Minisita o Tupe, e le tasi se Faalapotopotoga o lea e ave i ai le fesoasoani a le Malo i itu eseese, lea e i ai le vaega lea, le Faalapotopotoga lea, o e gasegase i le kanesa, o e gasegase i le tulaga ua le mafai ona gaoioi le tino, faalupe o pipili, po le vaai, faaletonu le mafaufau. Ia, faafetai o lea ua maua le togafiti o le fatugao. E le i faigofie foi ona aumai le togafitiga lea mai fafo, e fai si taugata. O lea foi e faataoto isi fuafuaga a le tatou Malo mo togafitiga nei i Samoa nei.

Lau Afioga i le Fofoga Fetalai, e le faapea o lou auai i se sauniga e tasi ma le vaai ia i latou, ona e faaaogaina lea o le le auai lea o nisi, ma e nofo ai ma fetuu le tulaga e le o lagolagoina e le Matagaluega o le Soifua Maloloina. Atonu foi e le o le agaga lea o le Sosaiete a le Kanesa. Ae afai na agai atu le Sao Faapito ma lona agaga e saili masei, ia o le a le mea a fai? Semeamanu o le agaga tonu lava lea na vaai atu loa e le o nofo mai, ia ua maua le mea ou te lauga faalauaitele ai ma faaleaoga atoa ai le agaga lelei o lea e atagia i le tulai atu o le Minisita ma le Ofisa Sili o Pulega o le Matagaluega. Ua faapolokikia le agaga o le Faalapotopotoga. O le a la le tulaga o i ai le Faalapotopotoga? E faapefea ona latou toe feiloai ma le Minisita, a o lea ua faafogafoga mai e pei ua tauleagaina i latou ona na o le Minisita lea na auai ma le Ofisa Sili o Pulega ae le omai uma le Matagaluega, a o lea e faafeagai tatou ma le Koviti e tatau ona mataitu lelei gaoioiga e tatau ona fai i le taimi lea?

Lau Afioga i le Fofoga Fetalai, o lou faanoanoaga lena, o le tatou o aumai ni uiga faapea e faapolokikia le Faalapotopotoga. O le a la le latou faalogologo mai nei? Lea ua te i lava ua avea le mea lea ma mea ua faatupu ai se va, i le va o latou ma le Ofisa Sili o Pulega o le Falemai, ona o lea ua faaaoga e le Afioga i le Sao Faapito le...

**Afioga Hon Fiame Naomi Mataafa:** Lau Afioga i le Fofoga Fetalai, o le mea e fia faasao...

**Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi:** Lenei Faalapotopotoga i le sauniga e tasi, e sau ai lauga faalauaitele i le atunu se i faafogafoga mai le atunu, o le faaleaga le mea lea.

Lau Afioga i le Fofoga Fetalai, ua uma foi ma le lauga. Tau ina faamanatu atu, o le matua tele o le kosi o le laina o le a faatupu le feinoinoai i le va o le Soifua Maloloina ma le Faalapotopotoga o le Kanesa, o lea e faalagolago i o aemaise o fesoasoani nei e avatu e le Malo.

Ia, ia manua tele le tatou Fonotaga i lenei aso, e lelei mea tutupu e maua ai mafaufauga.

**FOFOGA FETALAI:** Malo faafetai. Ia, se i tulai mai lau Afioga i le Sao Faapito.

**Afioga Hon Fiame Naomi Mataafa:** Faafetai. E leai, na o sina mea laitiiti lava e fia faasao. E le i auai le Ofisa Sili o Pulega o le Matagaluega, na o le Afioga i le Tamaitai Minisita ma le Afioga ia Salausa. Na o le pau lava lea.

O isi itu ua saunoa i ai le Palemia, ia, o lana lava masani lena, a o le agaga na avatu ai, ia faalautele atu le avanoa e faatino ai e le Faalapotopotoga le auauanaga e auala i a latou tagata faigaluega. Ia, faafetai i lau Afioga.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, ia o lea foi la sa auai le isi fomai. E pei o le tulaga lena. Ae na ala lava ona aumai le mataupu lenei e le Sao Faapito, o lea ua te i lava ua faapolokikia le Sosaiete a le Kanesa. O se uiga leaga tele lea ua ou vaai atu ua tupu atili i le Sao Faapito, sa lelei le amio a o i i, a o lea ua matua mataga le amio talu nei ona alu nofo mai i o.

**FOFOGA FETALAI:** Malo faafetai.

**Afioga Hon Afamasaga Lepuiai Rico Tupai (Minisita mo Fesootaiga, Faamatalaga ma Fesootaiga Vavave Faaneionapo):** Lau Afioga i le Fofoga Fetalai, ou te tulai atu ma le faaaloalo, ona o lea ua tuumuli le Afioga i le Sao Faapito ma Olo, ae o le isi lea itu taua na laga i le lauga, ona o le tulaga foi lea i le taumafa tapaa i le autafa ane o le tatou Maota lenei ma aafia ai le tele o aufaigaluega a le Malo o lo o galulue e tautuaina le tatou Maota. Ae ta te talosaga atu ma le faaaloalo, pe i ai se vaega foi lele o le tatou fanua e mafai ona toso ai se maea, ia ona tuu lea i ai e faapea o le vaega lea e o i ai na o le au ulaula ina ia aua ne i aafia le toatele o tatou ona e oo lava ia ta ita, a ta alu atu i fafo o lea e taumafa ai le tapaa a Olo ma le Afioga i le Sao Faapito, ia e tiga lava le timuga o fafo ta te kami mamao lava i fafo, ua ou malie lava i lou susu, a ia aua ne i ou maua i le kanesa lau Afioga.

Ia pei o le talosaga lea ma le faaaloalo faafetai.

**FOFOGA FETALAI:** Ia, taatia maia lou finagalo se i ou mafaufau i ai. Malo faafetai.

Ia, ua tatou taunuu i le mutaaga foi o le tatou galuega i lenei aso, malo saunoa, malo foi le tauatai i le tulaga o le tatou galuega. Ia, e le faigofie, ae ona o le manatu ina ia saili manogi aua se manuia o le faamoemoe i le atiaeina o le Malo aemaise o le tapuaiga a Samoa.

Ae i ai le manatu, o le a talamaea le sui usufono mamalu lea o Faasaleleaga Nu.4 i le aso a taeao, e lelei ona faaila lea vaega, leaga o lea ua faailoa mai ia te au e fia saunoa. Ia, e lelei ona ou faapea atu, o le a talamaea lau Afioga

i le sui usufono mamalu o Faasaleleaga Nu.4 pe a tatou aulia i le manuia i le alofa o le Atua le aso Fono a taeao i le itula e 9:00.

Ia, ae tatou te le i tolopo, ou te tapa le sui usufono mo Vaimauga Sasae e faaiu mai le tatou Fonotaga i se tatalo. Ia, Vaimauga Sasae, lau Fetalaiga Sulamanaia, saunoa ia i se tatou tatalo e faaiu ai le tatou galuega.

*Na tolopo Taualumaga a le Fono Aoao Faitulafono i le itula e 1:00 i le afiafi seia aulia le Aso Lua, 09 Fepuari 2021 i le itula e 9:00 i le taeao.*